CBETA電子佛典集成

CBETA Chinese Electronic Tripitaka Collection ebook

T09n0266

佛說阿惟越致遮經

西晉 竺法護譯

目次

- 編輯說明
- 童節目次
 - 。1_不狠轉法輪品
 - 。 2 持信品
 - 。3 奉法品
 - 4 八等品
 - 。 5 道跡品
 - 6 往來品
 - 。7 不環品
 - · <u>8 無著品</u>
 - 。 9 聲聞品
 - ∘ 10 緣譽品
 - · 11 釋果想品
 - 12 降魔品
 - 13 如來品
 - 14 開化品

 - 16 歎法師品
 - 17 譏謗品
 - 18 屬累品
- 巻目次
 - · 001
 - · <u>0</u>02
 - 003
- 贊助資訊

編輯說明

- 本電子書以「CBETA 電子佛典集成 Version 2023. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta,org 回報。
- <u>版權所有</u>,歡迎自由流通,但禁止營利使用。

No. 266 [Nos. 267, 268] 佛說阿惟越致遮經卷上

西晉月氏三藏竺法護譯

不退轉法輪品第一

聞如是:

一時佛遊舍衛祇樹給孤獨園,與大比丘眾千二百五十人俱。彼時世尊於後夜起,三昧正受,號離垢光。文殊師利童子菩薩亦以普明三昧,彌勒菩薩導眾大士普顯三昧。

於是賢者舍利弗後夜寤起,自出其室,發心往詣文殊師利。欲入其室,未入之頃,見佛神室則前進矣。覩十万蓮華不可稱計圍繞佛屋,又復遙聞大音樂聲若干種響。其大蓮華自然衍光,遍照祇樹,悉周舍衛靡不見焉,三千大千佛之境界光耀巍巍。

時舍利弗即立不行,抑而不候文殊師利,不自覺耳處于其室。住文 殊師利前,覩加趺坐淡然而定。時舍利弗即為彈指永不寤矣,聲發 洪音亦不興也,又一心觀文殊師利現大變化,感動如此。自察其身 在於大海,愕然欲出文殊師利三昧之室了不能退;將以神足起踊於 空亦復礙矣,盡現神力不得遊騰。又見己身與文殊師利及其室宇自 然東行。時舍利弗立文殊師利前,結加趺坐,視之無厭。

爾時,東方度是佛土恒沙等剎,其世界名不退轉音,佛號最選光明蓮華開剖。賢者舍利弗從文殊師利見彼聖尊,一切毛孔悉出蓮華,又其蓮華各周四十萬里皆照三千大千佛土。彼諸蓮華有十萬數妙寶為莖,及以金剛紫磨黃金師子之座,一切菩薩皆坐其上。

於無上正真之道不退轉,以得總持五通自樂成就法忍,三十二相莊嚴其身。

最選光明蓮華開剖如來、至真、等正覺齊生蓮華清淨無瑕,其色百千不可稱數,青琉璃莖姝妙交絡,上好栴檀珍寶為座,殊異珠鈴垂布四面。彼座獨空,文殊師利即處於上,與其蓮華師子之座踊變上至三十三天尋還詣佛。稽首作禮,繞佛三匝,還坐蓮華,彼世尊前叉手自歸。

於是最選光明蓮華開剖如來、等正覺問文殊師利:「仁者!何來枉至此土?」

文殊師利答曰:「唯然,世尊!從忍界來。」

爾時,彼佛侍者——號柔音軟響菩薩大士,志于無上正真之道逮不 退轉——則蓮華上更整衣服,長跪叉手問彼佛曰:「其斯忍土離是 幾何?」 其佛告曰:「西方去此恒沙等剎有忍世界,是文殊師利從彼土 來。」

柔音軟響菩薩又問佛言:「其忍世界佛號云何?今現在乎?」

世尊告言:「字曰能仁如來、至真、等正覺,現在講法。」

又問佛言:「其佛大聖云何現法?」

佛言:「開三道教。」

侍者又問:「何謂為三?」

「聲聞、緣覺及弘佛道,釋迦文佛說法如此,是三道教。」

侍者又問:「諸佛世尊說經、開化不普等乎?」

佛言:「悉等。」

柔音軟響又問佛言:「何謂為等?」

世尊告曰:「講不退轉,此謂平等。」

又問:「何故能仁如來、至真、等正覺宣三道教?」

其佛告言:「彼土人民剛強難化,心劣意弱,難以一乘救化度矣。 以是之故,諸佛世尊善權方便而為說法。能仁如來興五濁世,以斯 善權隨時之義而濟度之。」

又復問曰:「唯然,世尊!彼忍世界講法所化勤勞之難,乃如是乎?」

佛言:「實然,有勤危患。」

侍者復問:「我等世尊快哉善利,不生彼土。」

佛言:「且止,無得說此。宜當捨之,自改悔過。」

又問:「何故改往修來?而忍世界講法甚難,以故吾等不願彼土。」

世尊答曰:「諸賢莫念,重說此辭,當自改過。所以者何?於是佛 土修二十億那術百千劫殖眾德本,不如忍界從明至食為人講說度無 極法,開化愚冥歸命三寶、令受五戒。釋于聲聞、緣覺之道,是菩 薩大士甚難於彼,何況誨之使為沙門,捐俗近道以法將護,勸助導 示善法之義,或復昌顯立之大道,此為菩薩大士難及之教。所以者 何?其忍世界多有患難。」

又問:「何患?」

世尊答曰:「柔音軟響!使賢者身壽於那術億百千劫聞受無數諸佛國土本命極長,不可窮究,共計忍界懷婬、怒、癡無量惡法而不可盡。今吾口說彼人罪福因緣所著,又以佛慧了了分別,其忍世界瑕穢之垢,未央可竟。」

爾時,柔音軟響菩薩大士三反揚聲而歎頌曰:

「妙哉能仁如來!最慈師子人中之王!道德巍巍無所罣礙,念世尊明肅然恭敬。因本功德其意之願,而為眾生乃忍勞謙講說道義,除

姪、怒、癡無量蹇法,教發聲聞、緣覺之心,開化以漸使逮佛聖。 顯道深慧用一切故,遊眾德本,志無榮冀。」

諸菩薩等取七寶華一一其色光耀,無數百千,清淨無埃;又無量葉生金剛莖,其華之藕上猶交露,微妙栴檀眾寶合成,瓔珞分布而為莊嚴一一心達眼明宿之本德,所發興化現雅聖行,猶如幻化,欣悅盛意,踊在虛空,手執此華,遙向釋迦文如來、至真、等正覺顧彼忍界一心散華,如雨寶蓋、繒綵、幢幡,秉志供養能仁如來。已散眾香,而燒栴檀、雜香、擣香,自於彼土五心投地,西向稽首應時讚曰:「南無能仁佛、等正覺及彼忍界菩薩大士!無極德鎧志於精進,意無慢恣德備巍巍。其心究竟極尊聖妙,奉於正法。以法為力慈愍眾生,而奮大光等習一乘。」異口同音俱共歎曰:「願欲奉覲能仁如來、至真、等正覺及諸菩薩,佛之教訓令不斷絕。」於是最選光明蓮華開剖如來聞諸菩薩歌頌之聲,察其心源為諸菩薩大士衍以佛法,分別要義令心悅豫。告菩薩言:「諸族姓子!汝等

大士衍以佛法,分別要義令心悅豫。告菩薩言:「諸族姓子!汝等寧覩能仁無著正覺及忍世界諸菩薩學人民之處,修彼佛教順化眾生,欲度危厄,志懷慈愍。於深妙法未嘗恐懼,不以為難;未嘗謗訕,殖眾德本。心無所著不望想報,奉於六度無極之行。菩薩大士生忍世界,即崇能仁如來宿之本願,遵奉正法,以道為力,覺諸佛行。」

菩薩答曰:「唯然,世尊!承佛聖旨普悉見矣。又去來現在諸佛之慈恩也,永無疑網。」

最選光明蓮華開剖如來、等正覺告柔音軟響菩薩:「汝等當與文殊 師利俱至忍界,奉修訓誨使心㸌然。」

柔音軟響菩薩白文殊師利:「吾等欲詣能仁如來觀忍世界,承仁聖慧令願得果。」

文殊答曰:「快哉行矣。眾族姓子!諸佛世尊難見、難遇。所以者何?億世時有。當共僉然供養奉事。所以出世於十方界,矜愍眾生,化入大道,令逮覺慧,當為一切蚑行喘息人物之類供順、修禮諸佛世尊,諮問經典,令十方人獲致上慶。」

菩薩答曰:「令吾等身與尊者俱,奉見諸佛歸命啟受,習學聖智慈 化群黎。」

於是,文殊師利稽首禮彼最選光明蓮華開剖如來、至真、等正覺, 繞其三匝。與諸菩薩恭肅敬意,及舍利弗——聞佛說法、受其教, 命視佛無厭,觀身五事若如幻——各以華香、栴檀、雜香、擣香、 繒綵、幢幡以供養佛,蒙佛本德心堅意固,遵奉三寶,欲度眾生奉 侍佛焉。

說此適竟,如中臂頃忽然不現,則至東方恒沙等剎佛世尊前。皆聽 諸佛等衍是經,講不退轉方等無垢清淨之明。彼諸佛土悉無女人, 亦無聲聞、緣覺佛教,一切佛土德義悉等鮮潔之命,猶如最選光明 蓮華開剖如來佛土等無差特。菩薩道場充滿佛國,彼諸世尊蓮花皆 同出其臍中。

文殊師利普如座上感動變化,威儀如一,供養諸佛——東方、南方、西方、北方、東南、西南、西北、東北、上方、下方——時於十方各如恒沙諸佛之土,文殊師利悉現其前,無不周遍。

彼諸如來盡悉講是不退轉輪方等無瑕。一切侍者恭敬肅肅,志存大道,在蓮華上長跪叉手,自問其佛:「能仁如來何故興此三道之教?」悉欲往詣能仁如來,諮啟法化,從文殊師利求恩見濟。十方亦告諸菩薩曰:「汝等侍衛文殊師利,俱至能仁如來佛土。」

於是,忍界閻浮提處——夜尚未明——賢者阿難時見光明從軒窓入,即從臥起欲出精舍。覩其祇洹光耀如晝,仰觀虛空亦不見月。 察其祇樹但覩其水,青青如璧柔軟且清,了不復見樹木房室。心自 念言:「今日旦當講大深法,以故先現此之瑞應。」

於時阿難舉足入水,水不著足,無所濕溺,欣然大悅。往詣神室欲見世尊,見千萬蓮華繞佛神室,又聞洪音作若干伎。蓮華出光照於祇洹及舍衛城,三千大千世界靡不明達。志懷欣豫,偏袒右肩,長跪叉手,稽首作禮,自歸於佛。

明星出時,夜以向曉,諸大蓮華繞佛室者,大蓮華入於祇洹正住於中。阿難心念:「今吾宜往為佛施座,此則說法本之瑞應。」適布座竟,尋時三千大千世界六反震動,十方佛土各十恒沙亦復如是,大意咸達莫不驚欣。青蓮華、紅蓮華、黃蓮華、白蓮華普遍佛國,自然生樹,枝葉華實亦以茂盛。

諸比丘眾各欲出屋不能自致,見祇樹園為水所溺,水軟且清,住精 舍戶惟見大光。各心念言:「今日當說大微妙法,以故先現此之變 應。」

彼時世尊能仁大聖從三昧興,出其神室,就師子座。佛身適坐,應 時十方一切世界諸佛世尊身奮大光,色色各異不可稱計,於彼黎民 莫不覩焉。

於是,文殊師利周於十方,與眾菩薩遊諸佛土普供養遍。是大菩薩導眾大士,神足示現,不可思議救利萌類,持順佛法教化度脫,隨眾所樂而以開導,為十方人各說法竟。文殊師利見能仁如來坐師子床,諸菩薩俱於祇樹園從地踊出,與無央數億億百千那術兆姟一切菩薩,繞佛世尊無量之匝。各化蓮華不可稱計,有十萬葉,其色各異,以供養佛,是諸蓮華布佛境界無空缺處。

又此菩薩散栴檀香、雜香、擣香、妙香,其香悉熏三千大千之國土,皆興美香。布施、遵戒、忍辱、精進、一心、智慧、善權方便神通之香,分流法香、六度無極菩薩微妙道慧之香、具足經義修行

之香,是輩眾香盡衍大光。其明周遍十方佛前,勇猛意強承佛威 化,供養能仁如來、至真、等正覺。過大精進勤修正道,其心堅固 莫能踰者,歸命如來。

時文殊師利與諸菩薩一切眾生莊嚴如意摩尼,現眾寶樹八品行行。 有名寶樹邊竪幡,交露珠帳紫磨黃金,而以校成明月珠地,化造屋 室講堂樓閣,天窓軒牖刻鏤籠疏。泉源、陂池、江河之流、苑囿泉 水中生蓮華,青、紅、黃、白葉皆明珠,無不周遍。地出甘露,有 八味水。欲悅眾生示現大道,發菩薩意之所當行,故為一切垂哀變 化。

文殊師利承佛聖旨,順己道力,能仁如來本之所願,故以此變開化 眾生。柔音軟響菩薩等俱多所勸助,不可思議無心不心,善心思唱 導被大德鎧,順其精進身行高德,昔心所志莊嚴虛空,一切畢竟皆 住佛前。

於是,世尊遊以道教,放法光明照文殊師利及諸菩薩大士之等,使有床座。應時自然十萬蓮華從佛身出,光色無數不可稱限,百千顯耀而獨照明。以寶為莖,珍寶之珠遍垂周匝,摩尼交露栴檀雜香師子之座。是諸菩薩大士之眾皆坐其上,處于處空。

時能仁佛臍中有光——號曰金剛,又名救濟眾生之類——而放此明,億百千蓮華光曜各異,無能計量。蓮華光明,清淨微妙,紫磨金色。交露之帳甚香鮮潔,顯照十方無所罣礙。此蓮華中自然化出億千蓮華。一切諸佛皆受法界平等一類,訓誨眾生起度脫門,及言教聲空無思想,不願之法無有邪行,不起不滅三世等空。其目清淨自然軌迹,化出億千名寶蓮華。

文殊師利安詳雅步,其心寂然則坐其上,不著佛身、佛體無想。心念:「世尊覺了一切,所志三昧號踰金剛。而學能仁如來、至真、 等正覺之法,則行越空無不慕三昧。」

於是,世尊見文殊師利及十方佛國菩薩大士坐訖悉定,修諸佛法,供養過去無數大聖。

文殊師利所見攝持心不怯弱,順佛道行處師子座。

時佛則告賢者阿難:「汝去遍令舍衛祇樹園中內外比丘、比丘尼、清信士、清信女——信樂三寶佛眾僧,殖諸德本——行欲向城,悉使來集,今當說法。」

阿難受教,遍行宣命。比丘對曰:「吾等今夜見大瑞應,即時察知 當講大法衍深要事,欲得往會不能自致。」

時阿難問:「何所妨礙?」

答曰:「皆見祇樹為水所溺,水青如璧,柔軟且清。不見樹木、屋室悉沒,惟見大光。以此之故不能自致。」於是阿難具以啟佛。

佛告阿難:「此比丘等閉隔不解,都無有水橫造水想。如此比丘無水調有,不但齊是心意不開,無色痛痒思想生死之識,反謂有矣。 不持信謂持、不奉法想奉、未致八等心想獲矣,道迹、往來、不 還、無著之道亦復然矣,不成聲聞心念辦矣,不了緣覺心想致矣。 汝復更往,重告來會。」

阿難受勅,一一令語如世尊教。還白佛言:「今四部眾皆來集 會。」

於是,世尊告賢者目連:「汝至三千大千世界悉呼深學菩薩大士——被無極鎧,志求大乘——比丘、比丘尼、清信士、清信女、天、龍、鬼神、犍沓恕、阿須倫、迦留羅、真陀羅、摩睺勒、人與非人,使知今日有大法會,未聞之要。四部弟子、人與非人——或在天上、或處世間,皆以奉敬過去諸佛,志於大乘學住一道,心慕大慧妙尊最上巍巍無極——菩薩大士被巨德鎧,求利法義,精進不廢,悉使來會聽深妙法。」

目連受教承佛聖旨,自以道力如申臂頃,遍三千大千世界宣告:「如是有未甞法,當共普聽。」尋以神足還住佛前,白世尊曰:「宣告已周。」

爾時,四輩圍繞充滿四十萬里;諸天龍神住於虛空,五十萬里無空缺處。

爾時,文殊師利白世尊曰:「今四輩人悉來聚會,諸天龍神填於虚空,悉共一心叉手禮佛。皆觀如來威神之變,光耀暐曄靡不通達。 眾會坐定,恭敬恭肅,願佛說法。」

於時世尊即尋欣笑,七寶蓮華從地踊出。蓮華之葉有無央數百千交露之帳,如大高車超天帝座,垂明月珠、赤珠、瓔珞、眾珍為幢,向於八方欲濟八難。一切眾會四輩弟子——比丘、比丘尼、清信士、清信女——諸天龍神、犍沓恕等,人與非人悉坐其上,普察尊顏。

文殊師利所從菩薩大士之等,相好具足,威神巍巍,志同一類,在蓮華上一心叉手,恭敬元元察佛聖德,及文殊師利志求大道。

於是,文殊師利前白佛言:「今四輩眾、諸天龍神咸皆渴仰,願佛讚說不退轉輪離垢之法。此比丘、比丘尼、清信士、清信女、諸天龍神無央數千,懷篤信想、奉法之想、志八等想,道迹、往來、不還、無著,聲聞、緣覺各興此想,是故世尊蠲除此念。何故如來光于持信至於奉法顯緣覺行?」

於是,世尊默然不應。

舍利弗白佛言:「唯然,大聖!吾於後夜寤起出屋,詣文殊師利。 覩世尊室則欲進前,見十萬蓮華繞如來室,出大光明照于祇樹舍衛 國城及三千大千剎土,聞洪法音伎樂之聲。惟佛解說此何感應?」 佛言:「今當講此不退轉輪,文殊師利俱共分別是之本瑞。」

阿難白佛:「今於後夜見大光明從軒牕入寤,從坐起出見祇洹為水

所溺。水軟且清,不見樹木及與精舍,但見大光。此何感應?」

佛言:「今文殊師利當說深法不退轉輪是之本瑞。」

於是,世尊為賢者阿難說頌曰:

「此諸佛不我, 一乘而無上, 其軟音勇猛, 因緣興問斯。 是乘則清淨, 佛道無有上, 今所興問斯; 普柔音勇猛, 清淨離調戲, 此乘無想念, 今所興問斯。 普軟音勇猛, 普軟音所問, 救濟一切乘, 不起亦不滅。 非處無所成, 一切所諮嗟, 此不成道果, 世尊為本無, 此教則成實。 普軟音勇猛, 今所興問此, 於此離響者, 一切聲平等。 普軟音所問, 因動而有聲, 其聲不可獲, 法無響無字; 法聲等如風, 普軟音所問, 欲今度響著。 離形無所立, 阿難日聽是, 普音 产所間, 道正法時身, 塗想亦復空。 諸佛等下覺, 空寂無有相, 說設若不說, 一切法無住。 道迹之所趣, 平等覺無色, 獲來不還反, 此佛所說法。 離形遠眾相, 如虚空無數, 此為普音閏。 佛道如不著, 過去當來佛, 于今亦復然, 為現道慧意, 未甞見有塗。 不可覩法界, 但以音聲耳, 分別經本無, 此法乃為道。 淨戒亦復然, 布施度無極, 忍辱度無極, 此說現佛道; 精進度無極, 一心亦俱然, 現道之慧明。 智慧度無極,

佛善權方便, 神通度彼岸, 假聲講佛道, 於俗無所著。 為現三乘教, 宣揚說果聲, 導師之所講, 隨順察本性。 吾興万濁世, 知劣懈廢人, 故為佛乘者, 使人成大聖。 吾現四果音, 已成無著道, 諸法無緣會。 因音調聲聞, 所謂眾合會, 教皆有所立, 現在獲因緣, 故說目前法。 羅漢謂聲聞, 因觀成緣覺, 永不起法忍, 菩薩之所親。 其空無有想, 平等禪不願, 三脫之門音, 以故說泥洹。 不著於往古, 來現在亦然, 十方之所興, 不起無所有。 普音今所問, 法深妙無量, 不廢致果想。 逮力之至誠, 以專於一乘, 不想一切法, 故啟問於佛, 德果之緣念。 此三世平等, 空寂而無想, 已度一切音, 不猗著佛道。 猶如有二十, 江水之流沙, 菩薩數如此, 普音之所化。 從諸佛聽採, 菩薩所修行, 三淦滴平等, 讚揚入大乘。 普音志勇猛, 為決除眾網, 故問吾道惠。 興著牛德果, 此佛所建立, 修願亦如是, 遊演三乘等, 以濟勤苦患。 普音志勇猛, 因為此等造, 啟道師講法, 示菩薩道行。 諸天億百千, 處空供養佛, 志好於德果, 欲決此猶豫。 其四輩比丘、 比丘尼居士, 想著於德果, 故分別令解。 拔除諸疑網, 普柔是以問, 此諸菩薩會, 猶欲採此法。」

阿惟越致遮經持信品第二

於是,世尊說此偈已,賢者阿難前問佛言:「唯然,大聖!文殊師利今問如來不退轉輪乎?」

告曰:「如是。乃當講說不退轉輪耶。」

佛言:「阿難!諸佛世尊因不退轉為應說法。」

阿難又問:「最勝何緣轉持篤信至於緣覺?如來惟顯菩薩法乎?」 答曰:「如此。阿難當知,惟暢菩薩經典為上。所以者何?吾身故 興五濁世,用懈廢者志懷羸劣。諸佛當以善權方便、隨時之宜講說 經道,少有志樂微妙之訓,多慕卑劣。是以如來善權方便而為現 法,開演大乘乃應本要;是以觀心順所發意而救度之。志若得入調 柔安隱,無所造立苦樂得除。誘無從生,不起不滅,無為之安,漸 向大慧一切之智。」於是世尊默而不語也。

爾時,阿難問文殊師利:「如來何故默而不言?」

答曰:「俗人少有信此法說。此諸羅漢無數百千心中愕然不解:

『如來何故說此殊異經教?吾今目覩此四輩人心鬲狐疑,曷因如來 演處,持信至于奉法緣覺有礙欲令進達此?』無數億諸天龍神咸共 猶豫:『何因如來顯敘菩薩,道迹、往來、不還、無著緣覺之

道?』無量菩薩億百千姟,不了世尊以菩薩道歎詠執信至于奉法四 果緣覺。一切江河、川流、泉源窒不通行,飛鳥在空不能進退,日 月不前翳無光耀黯黮晝昏。所以者何?此法微妙難解如此,是故如 來默然不言。」

彼時十萬蓮華繞佛室者,一切同聲咸共勸助:「唯然,世尊!講不 退輪清淨方等經典之要,吾等常從九十二億百千姟佛聞此經慧,於 斯佛土弘修是法。」

時舍利弗復前求哀:「惟願大聖演不退輪。吾今後夜與文殊師利俱遊,等至十方無數佛土,聞諸佛世尊說是妙法。」

於時虛空中八十五億百千姟天自歸請求:「欲令如來說不退輪,吾等此土從九十二億百千姟佛諮受此法。」

賢者阿難復白佛言:「惟願加哀說不退輪。何因世尊諮嗟篤信奉法之義至于緣覺?此四輩人靜然無聲,欲聽世尊分別說之。今無央數百千之眾閉結不解何故?世尊光顯菩薩持信奉法至於緣覺,當決大疑。惟願如來興隆大哀,蠲除所滯,普共證明信此聖道。」

佛告阿難:「如是,如來、至真、等正覺不釋明證而說經道。」

阿難白佛:「何謂明證?」

眾祐答曰:「明證經籍及諸聽者然後說法。如來法力最明等覺,因 其明證而為分別。阿難諦聽,善思念之。今為汝了如來所因,光美 菩薩持信奉法至于緣覺。」於是阿難與諸大眾受教而聽。

佛言:「阿難!何因如來讚揚菩薩篤持信乎?於是菩薩開化無量不 可計人,使立篤信得覩諸佛。

「已見大聖,不著佛身、色痛痒思想生死識,亦無所慕,五陰如 空,是調菩薩執持篤信。

「又,阿難!菩薩信諸法空、如來所說,等無有異。

「又,阿難!菩薩信成佛慧,心自念言:『何因致其平夷之智?了 不見慧之所歸趣?』如是等觀,謂持篤信。

「又,菩薩不信五欲,獲致道力,是謂篤信。

「又,菩薩何緣調心分流法施,獨逮如來、至真、等正覺?其心澹 然篤于法施,心懷此念是謂持信。

「又,菩薩一切所有皆能惠施,不惜身命勸助於道,不擇布恩無所 矜恪。一切是福勸助於道,等造空觀不見菩薩,如是察正則謂為 信。

「又,菩薩篤于佛道而心不荒,好寂寞法攘捨六情,不慕諸種志於 聖軌。其不篤道開化立之,令順佛經勸使興樂、發大道意,不得彼 心而無所著,等於法界。

「何謂知等惟言聲矣?等諸四大諸種叵獲,有信所作,萬物無常, 苦空非身。則致此力信聖戒義,而無放逸清淨之禁。

「定意正受寂滅無為,信一切界悉歸空盡,身等無異,是則信根。 「如此等觀,不捨眾生,覩一切人法界同等,則不復見法界所在。 所以者何?一切群黎究歸法界,假使篤信諸法如此,是謂持信。

「又,菩薩皆信眾生諸有欲貪亦不有受,猶空自然。不見眾生之所 立居,省視一切蚑行喘息人物之類悉是泥洹。所以者何?眾生空故 審實本無,故見眾生悉為泥洹。令無數人奉信如此,以是菩薩則謂 持信。」

於是,佛頌曰:

「開化無數人, 令見無量佛,

於彼無所著, 是則謂持信。

信解一切法, 分別皆為空,

篤樂如此教, 是則謂持信。

志慕於道慧, 心常思於彼,

吾已當因緣, 埭心所志明。

於五樂之欲, 未甞信樂之,

以得此信力, 是則謂持信。

信於奉禁戒, 吾何因逮成, 猶如佛大聖。 興行於法施, 彼勇猛之士, 心信行布施, 志無所想報, 是則謂持信。 敢有乞求者, 一切等心施, 既興無施想, 是則謂持信。 好樂於惠與, 一切無貪垢, 皆已向聖道, 是則謂持信。 蠲除於六情, 親了無所求, 以獲得法力, 是則謂持信。 恭肅向於佛, 究竟心鮮潔, 是則謂持信。 常篤於道法, 其心無所求, 遠捨於六病, 五陰以永除, 是則謂持信。 若人不如道, 勸化令欣樂, 不疑於佛法, 是則謂持信。 若見歡喜者, 勸導其消意, 是則謂持信。 自察心不得, 慧平等六衰, 法界不差特, 土界言聲耳。 於十無所獲, 心常思終始, 若空無吾我, 於慧有大力, 是則謂持信。 好修聖禁戒, 清淨無放逸, 戒定具足成, 是則謂持信。 好樂寂然界, 眾生亦復然, 彼為有至相, 是則謂持信。 法界亦如是, 不捨一切人, 計彼眾生種, 經界無思議。 是信乃為了, 如法界無異, 菩薩無所畏。 以故歎篤信, 眾生皆自然, 計了無住處, 普了明法空, 彼處不可得。 其群黎亦空, 一切人無為, 故為一切顯。 此為寂泥洹, 菩薩若勇猛, 解眾生如此, 以故得名號, 稱揚於持信。 行篤法如是, 歎之為持信。 阿難!當持是, 分別說亦然。 阿難!吾因此, 遵行道無餘, 是法成等覺, 菩薩演光明。

「如是,阿難!如來、至真、等正覺以此之故,歎立菩薩,則為持信。計視此義,善權方便而開導之。」◎

◎阿惟越致遮經奉法品第三

佛告阿難:「如來、至真、等正覺何因讚揚菩薩奉持法乎?菩薩於此存於佛道而不退轉。執持覺軌了了分別,不越法界。不可思議逮得經籍,所可總持常處不動,志順法句質一切疑;諸法自然無所猗著,所可總持不有依立,順於總持不專經本。志常樂聖欽敬道者,於一切法而無所受,以不受行乃為演說法。

「志性仁調,進止安隱,講寂然經,於此持法不猗不捨。一切自然則聖道相,以獲此義未嘗越失其身所行,體常堅住世非有處。

「何謂菩薩常覩察之?未嘗見此身安諦住,自順正法等于境界不去不來。作是解知,諸佛菩薩所可說法,逮得此籍清淨無垢,見一切法無合無散。

「離心無心,心不可得,設不可得,則為道心。而無去來講寂然 行,不有言說無所慕求。於法如此無依因者,所以不猗不興法貌。 常順經典是菩薩法,而無所著不生泥洹。

「彼說此義猶如顯致,不慕種姓以獲如此,捨諸種姓逮菩薩行無所得法。

「於諸往返不去、不來,一切諸慧無去來今,執信如是不動、不搖,不退、不捨,奉持諸法不急、不緩,是謂持法得菩薩道。既得聖行則無所得,以成如是菩薩大士,名曰奉法。」 佛於是頌曰:

「一切諸佛法, 未嘗有退轉,

奉持經如此, 是則為持法。

講諸佛佛法, 無想不自然,

甚深不可得, 是則為持法。

未嘗毀諸界, 法界無思議,

以得致彼義, 則謂為持法。

奉法慇懃殼, 諸佛之所行,

其心無所著, 則謂為持法。

所執無進退, 一切法自然, 則謂為持法。 眾經無所著, 不立於寂滅, 奉持履大辦, 以隨順彼典, 則謂為持法。 道常為法身, 慕求微妙說, 棄捐於懈怠, 是則為持法。 學思而翫習, 聽經則採受, 是則為持法。 性仁游居安, 常講澹然義, 執經而不著, 得致無想行, 是則為持法。 堅心立於道, 明智行無住, 於身常無身, 彼解深如是。 法界則平等, 以致於空身, 分別身諸想。 無往亦無來, 諸佛及菩薩, 所可講說法, 普逮此經典, 是則為持法。 彼界甚清淨, 一切法無為, 以奉此經者, 是則為持法。 廣察一切經, 適見便不見, 若不見諸法, 彼則無所持。 是諸界皆空, 則為講法界, 自然離眾想, 無形不調戲。 其心捨諸有, 志亦不可得, 設不能逮心, 此念為最上。 所志無有意, 講法寂然義, 無言無所著, 是心乃為尊。 以能奉此法, 所興不有著, 不猗於諸界, 是則為持法。 菩薩所奉法, 如是應經籍, 不依無所舉, 示現無有造。 如是行善訓, 順彼諸種姓; 以得是義者, 故讚揚種姓。 謂為菩薩義, 以殖於此姓, 能順此總持, 是則為持法。 了不見諸法, 一切無所趣, 亦不是彼法。 其若咸馳至, 其解一切法, 當來亦無趣, 分別了總持, 不制不動搖。

彼則興造法, 非捨無所追, 不舉無所下, 總持樂於法。 於諸法無法, 講說不有著, 不得於諸經, 是則為持法。 阿難!吾以故, 開演菩薩行, 逮致微妙道, 是則讚諸法。 阿難!吾以故, 歌頌奉法者, 用人想道玄, 開導此等類。 降此無數法, 菩薩之所讚, 善權永安隱, 故歎於此經。」

佛告阿難:「是故如來、至真、等正覺讚揚菩薩總持之法,此所現 義亦善權方便。」

阿惟越致遮經八等品第四

佛告阿難:「如來、至真、等正覺何故讚揚菩薩八等之義?於此菩 薩遠于八邪,獲致脫門而無所著。

「不猗八正,度凡夫法,立於道義,獲致中正,超于凡俗,願立道慧,不見得塗,出於邪逕,常住正觀,獲平等跡。離於貪身,願住道義,逮致佛身。除超人想,常思佛教,等心一切。

「遠眾生著,常處無猗,諸法悉斷。所以者何?法不可獲,身所崇力;離世俗籍,慕度世典;獲定法界。不逮道法、亦不離俗,釋有無義,遵修平夷。捨斷著想,去來現在心念無殊,不得道意。所以者何?等志一切遵修普慧,毒火、刀杖不能危身。

「悉捨諸界致于佛土,不離諸道立無去來,道所往來輒弘大安,故 曰菩薩塗不有住。所以者何?佛道則空,是故無處。以無所住,刀 不向身,無能害者,斯謂獲安。適逮此行,無學不學,亦非所求。 不得聖賢,志未甞慕。以是之故,刀不能害,身無能動搖。一切道 遵空,分別空慧,刀不能害。

「用弘大慈愍,於眾生得寂定界,逮澹然界。弘施非哀,棄捐瞋 恚。其行慈者,則發明慧,以慈化世,成就大哀。不得人處,厥慈 具足,刀不能傷。

「等於欲界、色界、無色界,等于法界、平均之界,道無若干。不 興識念,無有瞋恚,離於調戲,寂然無音。法界如此,度諸所有, 菩薩造行,諸可專心。一切音聲所至到處,法莫有所奉,不住終 始。 「群黎所趣但音聲耳,所為了了講法化者,有無說想與其言也。以 捨我想度諸音聲,越于等邪,逮得是教。解一切法,言音聲耳,亦 不獲法,莫有度者。是謂八等。未甞慕著一切音聲。」 佛於是頌曰:

逮致八解門, 「以住於八等, 是謂為八等。 於八無所著, 越八凡夫行, 得住於正議, 不覩中間慧, 是謂為八等。 得住干佛道, 超度俗夫行, 是謂為八等。 於是無所獲, 猿離眾邪見, 遵修於正見, 是謂為八等。 獲致平等道, 以除於貪己, 而立下聖道, 逮致得佛身, 是謂為八等。 棄捐眾生想, 常志修佛行, 平均吾我人, 是謂為八等。 得越眾生想, 住於無所處, 諸法盡逝過, 是謂為八等。 捐離於俗法, 奉修聖下教, 是謂為八等。 而致寂然義, 佛道亦如是, 所去為俗法, 是謂為八等。 於此法無得, 言有一本耳, 無有二元際, 蠲除如此念, 是謂為八等。 不處於中間, 無志斷著行, 道慧如平一, 是謂為八等。 不得過去心, 當來亦如是, 是謂為八等。 平夷於現在, 其發道意者, 始無心所由, 此心不可獲, 何緣如致道? 以入無所著, 如聖無可獲, 以故刀與毒, 莫能危之者。 眾相之所由, 脫離於五道, 是故謂無欺。 具足於往返, 所言音聲耳, 道捨不周旋, 是故不自欺。 棄除諸響著, 不得其所由, 從來亦如斯,

去來惟音身, 但勸於學者。 安化故有言, 其安亦復空, 以應如此學, 故能不自欺。 菩薩所翫習, 了學如此慧, 一切無所斷, 是謂不自欺。 彼不自貪己, 設有利刀刃, 莫有動搖者。 不能加害身, 普慈於一切, 樂道之大哀, 利刀莫能加。 捐除恚害心, 設有欲害者, 自計身空無, 而致獲佛道, 刀則何緣傷? 埭得澹然句, 棄除諸惡道, 一切殃盡滅, 刀刃不能害。 成就於明慧, 聖達無所乏, 顯耀逮佛道, 以故刀不害。 欲界及色界、 無色為三界, 等同斯三界, 是故不自欺。 等種成正覺, 不見名別異, 無陰豈所淨, 清淨遠調戲。 入斯平等跡, 故曰為菩薩, 若著音聲者, 無離於五道。 講其無所去, 雖言至法界, 以埭不住忍, 謂之為八等。 分別諸響應, 講說寂然法, 無念非有名, 故謂為八等。 除釋一切音, 而得無聲界, 是謂為八等。 不著一切響, 因聲解諸法, 一切法自然, 不見有度者。 諸法無有名, 讚揚正八等, 阿難!我是故, 義響而趣斯, 是亦無所獲。」

佛告阿難:「如來、至真、等正覺歎美菩薩演八等聲,斯議所趣權 慧方便也。」

阿惟越致遮經道跡品第五

佛復告阿難:「如來何故諮嗟菩薩為道跡乎?軌能通流至於佛心,菩薩住此,諸所興造永無所立。不進、不懈,度一切法,逮于佛流。不著仁慧,非猗於法,無所著行,而弗有處。

「具足妙行得獲聖跡,精進菩薩其力堅強,心慈忍辱未甞懈怠,捐 除慢惰慕求妙道。世遵最上,不著聖行,亦無所住。

「存在斯道而求諸法,其所索者永無可獲,未甞動搖。雖住於道, 計聖生死,佛慧平等,棄離眾樂。而等陰蓋,滅除一切貪身邪見, 勤修觀佛。

「察彼精進以覩聖軌,悉除諸想超度吾我,是謂道跡。不著佛路,得無為覺;不疑聖慧、佛之戒禁。不猗於世、不覩其戒,以無所見,則不有求。戒莫而慕除釋三結,正住三界乃獲大安。

「護眾生想,不猗不塗,捨一切著,乃得佛道,致寂然跡。不計身命,一切所有,施而無惜。諸根常悅,捐除恚色。遵修聖行,雖以惠與,無所放施,救群生隘。既有所度,不住無為。越一切想,興無念法,棄捐人想,而逮斯慧。

「不懼眾會,論于寂滅。用淨佛道,超度諸難,不畏生死。所以者何?逮澹然法而無瑕穢,聖化妙安。知無往來,鋤眾類想,但正道明志清淨行。」

時佛而頌曰:

「講論彼道跡, 佛聖無思議, 計眾有住者, 則為道所持。 聖慧最上安, 空寂不有住, 於彼無所得。 以獲斯道者, 菩薩志堅強, 惟趣是聖教, 世尊無有上。 志道不有貪, 心常採大慧, 以是為道跡, 不猗無所著。 所謂牛死想, 佛念亦如是, 具足正平等, 是謂解道跡。 無有眾陰蓋, 演析於道法, 是故除一切, 了斯為道跡。 眾生皆猗身, 興心觀佛道, 其意志所察, 常親干聖路。 身本時興結, 凶危想有我, 以故無塵埃, 不著干佛道。 初志懷狐疑, 將無不得佛, 以釋斯猶豫, 正立于佛道。

假使識於戒, 及佛所演禁, 蠲除諸戒想, 無應不應禁。 超度於三結, 等住干三界, 分別眾生想。 則獲致佛道, 習空明動辦, 而願求大慧, 埭志聖寂然, 不著于佛道。 常捨心布施, 棄捐瞋恚色, 以故無有命, 存道無放逸。 一切不矜悁, 救濟眾惱患, 是故謂道跡, 住處干上路。 當習無所著, 未甞興諸想, 斯已而不懼, 不游無禁戒。 善權捨諸求, 若習諸經籍, 處世無所畏。 覺了眾音響, 則不有諸難, 設至於眾會, 便唱澹然法, 淨治于聖道。 浩時興人想, 以解自然行, 則捨眾畏難。 用無強著故, 便不畏終始, 若捨眾患害, 埭得淨然道, 離垢安最上。 等了惡道休, 斯以無所懼, 平等上聖軌, 道恩則不離。 斯即菩薩法, 為現道跡事, 用懈廢劣人, 導利彼故說。 講論佛聖道, 以微妙善權, 是已為唱導。 若入菩薩者, 常合善方便, 導師所演法, 本行亦若茲, 志慕于佛道。 我是故,阿難! 分別說道跡, 多想求如此。 朦冥如意塞, 愚騃心冥冥, 為說不能解, 謗訕慧精進, 聽諸志深要。 阿難!吾是故, 歎美於道跡, 設了菩薩無, 是輩能解耳。 無數百千籍, 訓化於道跡, 履動之音聲, 為現佛道明。」

佛告阿難:「如來、至真、等正覺光耀菩薩謂為道跡,當知是義善權方便也。」

阿惟越致遮經往來品第六

佛復告阿難:「如來何故暢說菩薩為往來乎?於是菩薩入於佛道不可思慧,志求聖覺無量因緣。於諸憒閙無所興造,設致大道,慧斷諸緣,慕索佛明。求不亂禪,越一切定,釋諸塵埃,乃逮致法。等佛典籍,了一切經,惟求此義——如來所護道德之明。人未嘗動,無所轉移,則為法界。

「憂念眾生心閉意塞、遭眾苦患、不了經典,慕求佛道,立之此 慧。而志大明根力、覺意,脫門正受,分別是義。『吾身如何開化 眾人,令慕佛道?』常以此明勸化道場,而求佛眼心無陰蓋。若入 正觀導利世間,所志慧因諸聖之上。其不了慧,一切諸法之所歸趣 明不可獲,以是之聖,不求眾生便當立之。

「於此諸慧了法無處,以故當來覩群萌界,求無上處,慕於不念, 非得彼界。不來不往,成就眾生,往亦不往。開化人民了黎民處, 分別此義隨其開化,覩是諸法,一切眾生皆存法界。察以不見,等 御法界,則省一切。經典平夷觀于大道,以佛聖慧不得人無了人道 等,求如是像。

「無持之慧,離垢塵埃,故慧無非處。其以無慧求大明軌不可望 聖,是慧慧中之大明慧。不有諸求,求亦無所慕,是謂聖明之智。 菩薩所行能得是者,以故求來此謂往來。」 於是頌曰:

「此智有往返, 佛慧難思議, 志求於佛道。 是故謂往來, 開化多因緣, 乃成於佛路, 是事順慧均, 慕求不復還。 不猗一切禪, 勸化諸塵埃, 欲救濟斯等, 具足於往來。 佛經平等法, 分別人無相, 曉了如本無, 已故謂往返。 所可獲法者, 達了一切慧, 吾亦當獲是, 欲求所住處。 及計諸法界, 未嘗動眾生, 故謂於往來, 不折所歸處。 憂念無數人, 少智既遭患,

欲立於斯慧, 則求佛大道。 根力及覺意, 講詠三脫禪, 故求佛聖道。 分別斯義已, 志慕於道場, 過去佛所猗, 故謂為往來, 則立存大聖。 慕樂慈愍眼, 佛眼無思議, 是故為往來, 慕干佛大道。 諸佛之聖求, 世尊微妙義, 自志斯深慧, 一切智最上。 明智之所了, 一切法之歸, 其慧不可得, 及以求道者。 濟之無數人, 立之於上慧, 來者有所求。 以故為往來, 懷來覩佛界, 人界不思議, 故以為往來, 於彼救眾生; 省察眾生界, 求之不可得, 故以為往來, 慕心於法界。 群黎無所趣, 及一切人界, 若曉了彼處, 順所遊分別。 想一切諸法, 見以則不現, 求佛大聖道。 常一心定意, 如是微妙慧, 無垢而清淨, 而明所分别, 其智不可獲。 菩薩所欣樂, 開化於眾生, 則獲彼明智, 何緣來至此? 吾是故,阿難! 論講于往來, 覩示所興念。 為少智之人, 吾是故,阿難! 論說於往來, 人懷精進者, 爾乃曉了此。 有德者分別, 解深妙之義, 能獲於斯德, 速得成大道。」

佛告阿難:「如來、至真、等正覺頒宣菩薩為往來,當知是義亦是 善權方便也。」〇 佛說阿惟越致遮經卷上

◎不還品第七

佛復告阿難:「何故如來說美菩薩為不還乎?於是菩薩一切所存、 處處造行超越諸有,而逮佛明蠲除諸行,降伏此已則不復還。所以 者何?見一切法不有往還。超度凡夫,捐捨俗慧,入佛明智,獲無 所住,諸法平夷。所以者何?用致寂界非動凡夫,不立聖道塞諸惡 路。

「勉濟情欲,於食無食,逮上明迹。拔去諸見則無所著,無有諸邪 六十二見。已越生死觀於泥洹,踰之無為釋棄眾想。不隨經籍淨垢 惡道,捐棄貢高不懷自大。出於無點憂惱之先,破壞愛欲、滅除眾 冥、拔去貪樂,捨置塵埃、憍慢自恣,止息斯礙,遠離世智,故思 佛乘等獲聖慧。菩薩捐志捨愛欲界,則習本淨過去聖滅之志。厥慧 無上諸佛所解,欲以顯思,一切眾生極尊無極,為一切乘,此則佛 慧。菩薩獲斯諸想無想,等除一切狐疑之界,菩薩逮是則不復還。 「又問,阿難!其有人不住於道,悉當立之以道是者,覺了眾生明 爾則道,能覺如是則制人想。所以者何?知於空事,人界難議,平 等道慧。所以者何?分別若此,群黎之種則空,淨界人種亦空。遠 於眾想,一切諸人與空無特許。不有身、不獲、不住,彼則亦空。 虚空、無空,免一切想。無念致道,蠲除眾生。虚空之想,無棄不 棄。所以者何?一切諸法皆為平淨,一切眾生而無所捐。等於所 釋,故無所得;已不有獲,是以不來。此者乃計為之不還。有為無 為,於一切法覺了所會,越度諸患,故謂不還。」 於是,佛頌曰:

「彼則無所生, 造行如所處, 蠲除諸所住, 是謂不復還。 曉知於往還, 不著一切法, 所住不可得, 是故不還此。 其凡夫之行, 及佛世雄教, 不然無所量, 故謂不復還。 諸法無復來, 亦不得諸住, 是謂不復還。 以獲無去來, 其人未甞住, 不至干三淦, 埭致佛道明, 則謂為不環。

決除一切欲, 於食而不著, 則謂為不還。 得至於道場, 眾見之所行, 分别六十二, 不墮於彼際, 則謂為不還。 已捨離諸畏, 此法無終始, 斯慧如本無, 是故不至此。 所應無為寂, 不著諸塵勞, 是故不詣此。 浙除彼眾想, 已斷諸惡道, 洗去眾垢著, 學寂然無為, 則謂不復還。 降伏於弊魔, 及官屬兵刃, 是故不詣此。 永無有眾念, 蠲除愛欲根, 挽拔癡憂臧, 是故不詣此。 斷截盛貪婬, 拔去於眾想, 降制諸塵垢, 究竟至尊慧, 故謂不復還。 捐去眾愁感, 破壞於貢高, 故謂不復還。 億斷於五陰, 志乘得光明, 佛乘無有上, 不貪愛欲患, 故謂不復還。 已知佛藏處, 諸藏中第一, 是故不詣此。 過去佛所辯, 彼處於尊乘, 佛聖無有上, 截去諸狐疑, 是故不詣此。 受千無數人, 勸 立於佛道, 是故不詣此。 以得立聖軌, 曉了空無界, 等心於人界, 遠離諸著想, 是故不詣此。 曉了一切界, 法界亦如是, 眾生不可得, 是故不詣此。 分別黎民界, 虚空無思念, 一切法如是, 是故不詣此。 退除於眾想, 其人而無心, 諸念不成道, 則謂為不還。 吾是故,阿難! 歎說於不還, 得住於佛道。」 諸事永不來,

佛告阿難:「是故如來、至真、等正覺歎美菩薩為不還,亦當知此為善權方便也。」

阿惟越致遮經無著品第八

佛復告阿難:「何謂如來歎美菩薩為無著也?是菩薩沒一切行,離於處土;不倚諸佛,度脫眾生;不有所造塵勞之垢及與苦樂,以滅色欲救濟一切,故謂為無著。弗得眾生,不獲欲埃,非貪如,故謂無著。釋去侵欺處無所住,一切法空,以了寂靜,不習眾想。諸想以定,則除眾思。不計有人壞滅所志,而智空法得無所著。佛道無思,具足不怙,故謂無著。演說典籍,破壞眾瑕,歎於往古,等正覺教,當來現在,而不放逸。清淨離穢,唯論寂然,故謂無著。

「菩薩大士開化諸人,立于佛道求聖路者,於一切法而無所慕。具足慈心行佛之仁,永不有處。彼慈如此,故謂無著。化立眾生亦不得人,究竟大哀曉了不處,故謂無著。為眾生故,加恩見道,法無法想。斷除如此,故謂無著。讚揚覺力,計有願數,獲於不住。知拔除眾根,志化眾生,了清淨法使成道義,永不有倚,故謂不著。覩不依處,制不貪身,於諸萬物非有所依求。及與眾會不毀萬物,講有為法,如是無本,故謂無著。

「遊諸佛土,去無所至,不起本末,覩佛聖尊。覺道無寂,故謂無著。非有依處立如斯土,於無量剎平等諸國。不調戲界清淨不足,住福德之域空無諸剎。不退轉地無有女人,釋去塵勞睡眠之志。得佛聖國除陰蓋土,降魔官屬去諸怨敵。入寂然土感動變化,立於願剎土眾求國。

「菩薩具足之威耀住無所住, 覩獲佛意淨印印多所安國, 捨離一切 瓔珞寶飾眾垢之瑕, 究無為地一切最尊。成如是像微妙佛處, 諸法 皆空, 具足道行, 故謂無著。

「蠲除眾樂,諸根不可,於一切法不瞋、不怒。寂平等乘則為佛慧,身、口、心同習無上寂。慕求聖道不著軌迹,不想思人。悲念眾生無心不心,勸化無數億百千人,使立大道開示萌類、使念佛法等諸人物,導利無數眾庶黎民,令發聖意而無等倫。一切諸法均空特異,本空慧同立之不想。能等如是知無所倚,已了若此應其眾生而為說法,不慕諸利,無倚經籍,具足離根。講法如是,永不有言,多所化濟,不見度人,救於眾生。

「著斷諸事,免諸貪身,超越貢高。覩一切法不起不滅,開化群黎萬物之想。令不壞色、痛、痒、思想、生死之識,凡夫不動則應解脫。而立佛法著道迹者,化之不倚則成除勗。導利所依,令無佛想,則為勉濟勸發菩薩。

「弘不念心,救道因緣,諸憒亂意,離癡狂詐。具足三昧,成就定意,不懷眾想,拔於邪智,令覩正慧,化發聲聞。慕反迹者,制倚父母、妻子、舍宅、兄弟、姊妹,令除恩愛;度著國土、財色、萬物,貪求之想塵勞顛倒。開化諸著萬物之想,慕離於家而為寂志;懈廢羸劣等脫諸相,成入佛土欲垢之法。

「興發道意,心不有二,未甞生念,是無為法。此生死法,因緣無緣,道意俗心,犯戒護禁。開化此輩,興二相者,使其無念,度諸根本,故曰無著。眾祐賢聖,懈怠精進;男子女人,頑愚聰達。明聖闇結,導利此等,令無二心,救進眾生,故曰無著。

「是諸菩薩成不退意,或有受別,又復不著。斯諸菩薩近道、遠 道,分別此義,不生二想。得逮聖路,至不起餘而般泥洹,便離發 意而不有倚。緣此諸法以開化人,如是自然解一切法。演無根本, 故曰無著。」

時佛歎曰:

「釋除一切行, 所尊亦如是, 棄捐諸言教, 故曰為無著。 鋤捐諸塵埃, 度脫動苦患, 救濟于眾生, 名之曰無著。 察人不可得, 欲垢亦如之, 故曰為無著。 諸法無可獲, 立心處不惑, 蠲去眾顛倒, 分別知法空, 可日為無著。 了解知空義, 無有諸想著, 號日為無著。 除去一切顛, 捐除一切想, 及人眾惡念, 心無邪亂意, 故曰為無著。 解空無所依, 佛道不可量, 晶勉大精准, 故曰為無著。 講經所因緣, 淡靖無調戲, 勸人立道德, 與名曰無著。 真人修行慈, 欲令眾生安, 勸人不可得, 故曰名無著。 加恩眾生類, 本無講經籍, 未甞有人想, 故曰為無著。 正直根力覺, 為人分別說, 己身逮此慧, 故曰為無著。 知人之寂定, 清淨法致道,

開演大聖教, 故曰為無著。 現目之所覩, 不信諸萬物, 一切虚無有, 是謂為無著。 無倚諸佛土, 在國行仁義, 為眾生講法。 平等覺所處, 真人覺下教, 則覩于無見, 如諦觀聖覺, 是謂為無著。 成就自然國, 今我得知之, 究竟無本始, 是謂為無著。 除去諸所知, 心不懷瞋害, 應真如無恨, 習成寂然道。 靖泊無所起, 定意而不滅, 念道亦如是, 故謂為無著。 人物不增動, 眾生界如是, 億萌亦普然, 化立道之義。 群牛及與道, 所處永無念, 計慧悉平一, 是謂為無著。 平等無像類, 一切法亦然, 心正若如道, 故曰無思念。 所謂為應直, 諸法非所著, 能為人分別, 寂爾而無倚。 為人講法義, 雖言而無教, 普度無量人, 見眾不有動。 眾生無可獲, 諸民除斷著, 拔人離邪見, 度眾勤苦惱。 一切法不起, 所處亦無滅, 想眾生諸想, 脫群民困厄。 無增壞諸色, 痛痒亦如是, 想識於牛死, 濟之令無他。 不動賢聖法, 凡夫亦如斯, 度使志無著。 立之以佛義, 眾人懷果想, 及緣覺之念, 招越於覺意, 為人說此法。 以興發道心, 常依所布施, 戒忍亦如是, 故講無所倚。 知解之顛倒, 興習於精進, 以除斯諸想, 故說無著法。 道意之所念, 邪智若慧明, 於此無所倚, 故說無著法。 是法不生念, 了別無若干, 故說無所著。 而說如此法, 自計己有身, 聲聞多所念, 以為除此想, 故說無所著。 解知不若干, 諸法非有思, 演說斯無根, 故曰為無著。 父母兄弟子, 空寂之所有, 則為生死行, 不能成佛道。 所倚皆歸妄, 慕妻及姊妹, 設其不有依, 故名曰無著。 **浩興牛死事**, 則有親族念, 見因有情欲, 吾宿之友黨。 心馳眾諸事, 自念身有我, 必則處魔教。 分別墮顛倒, 棄捐於生死, 終始之災患, 故說於無著。 讚揚泥洹德, 所講勞垢法, 興衰及諍訟, 斯皆言聲耳, 是日為無著。 眾所多競利, 放逸貪萬物, 欲救此等類, 故說無著法。 戀慕室家者, 心念行學道, 頑鈍意如斯, 顯舉於無著。 唯見卑賤法, 不覩真妙義, 弗省於眾念, 故度至無著。 除棄凡夫義, 專精慕佛法, 拔去眾民求, 故曰為無著。 若覩善惡行, 如是眾數法, 故救放無著。 無量人亦然, 以具諸相好, 精進不可計, 而倚於此相, 仁賢得濟度。 莊嚴諸佛十, 成就尊上法, 依怙覺正利, 度之至無著。 無為法之義, 若得或不獲, 斯乃聖道行, 則能立正願。 無戒不覩犯, 放逸及智慧, 闇昧軟弱人, 便著斯三事。 眾牛興此相, 諸念不可計, 蠲除若干意, 故說無著法。 存慕聖眾祐, 亦念於無德, 分别凡人法, 故說無所著。 以得如是行, 男子及女人、 賢聖與凡夫, 斯則興二心。 人起此二事, 愚行之所為, 用倚是二際, 故度至無著。 迎動不退轉, 欲以折聖道, 故興心此念。 獲致於大道, 不起無所滅, 心常懷想著, 用求於無為。 於彼受眾生, 仁人念萌類, 以故曰無著, 救濟諸求想。 是則菩薩法, 為現阿羅漢, 因以發法忍, 自謂為無著。 講說羅漢事, 斯應為菩薩, 名住無所著, 獲致無上道。」

佛告阿難:「如來、至真、等正覺讚歎說菩薩無著,亦當知之善權方便也。」

阿惟越致遮經聲聞品第九

佛告阿難:「何故如來光耀菩薩為聲聞乎?菩薩大士開化無數不可計人,令聞佛法,分別經籍,故謂聲聞。使聽聖道,淨不放逸,故謂聲聞。使聽無為,安隱甘露。根力覺意、意止意斷。具足此事,速至道慧,故謂聲聞。

「令得空慧身無堅固,闇昧之人閉塞不解。所以者何?乃貪己身諸 入之事。眼存為色,了觀如是則成佛眼,其目普見不可思議。眼無 所倚,究竟此目,致一切法,故謂聲聞。

「計此諸法如呼之響,莫得著音。非有說者,亦無聽者;無香想香,亦不有嗅。譬如有人臥出夢中,嗅種種香,計此無香,此則或事思想所為。一切諸香人所嗅者,譬若如夢而無堅固。解斯音者則謂聲聞。

「舌之味味,亦復為空。若肉段如為舌,或智者了之,不為味惑。 譬如聚沫,以離諸論,無可為喻。明者觀之,知無所有,不可得 持。想著味者,則致惡罪。莫思六界以分別味,心則開解,意不放 逸。若知此者,心想無為,各各分別,謂所聽義。而聞此空,故謂聲聞。

「曉了其諸入之事,聽之為空,身自寂然。未甞有生,不知所起, 無生不生,則為聖道,故謂聲聞。若所聽者,皆無所有,解身自 然,不起不滅,故謂聲聞。

「聽于布施,惠以法行,不可思議!佛猶此路致於佛道。心有所施不自見心,以無意志逮得聖慧。所以者何?如其所種,必獲其實,亦不有果,說果之聲。聽衣食施、計物之施,所與薄耳;一切所捨,法施為尊。無得貪惜,莫懷施想,雖有所惠,不得悕望。譬如幻人,無有心意,不與想念。欲成行者,無得想施。所以者何?施不悕望則順道行,故謂聲聞。

「離諸所音,一切塵埃都無所聽;離諸有為,不可以音聽受佛法; 分別諸響而無所倚。所以者何?二事造聲。雖有二事,則無所有; 因緣合致,則有二事。用有人故而致法音,故謂聲聞。」 於是,佛頌曰:

「使無央數人, 聞佛無念法, 則勇猛菩薩。 以故謂聲聞, 聞寂定之道, 恬靜不放逸, 無量人聽法, 故謂為聲聞。 諸樂非有像, 聽澹泊安隱, 以故為聲聞, 至寂然無為。 聽干覺根力, 且足意止斷, 自究竟斯事, 故謂為聲聞。 不可得堅固, 聽身所有空, 愚騃之所慕, 故當時了體。 其目無所覩, 不聽亦如茲, 眾生為見侵, 闇塞不了了。 若得成佛眼, 等自不可議, 致之 在本無, 開化諸醫昧。 無量人閏經, 諸法非有興, 此以得名號, 稱存干聲聞。 其無所聽受, 了之如呼響, 不見有說者, 亦復無所聞。 所以名聲聞, 令眾人聽受, 莫為音所惑。 計本不有聞, 譬如人寐夢, 嗅於無數香, 恍惚不可得, 游逸嗅於空。

了香亦如此, 未甞有嗅香, 無量人失志, 菩薩令開明。 計舌無所猗, 肉段不知味, 設使肉解甘, 舌亦當識之。 念美為凶危, 無倚此諸想, 六界不可念, 分別諸味種。 菩薩大勇猛, 目覩分別此, 故曰為聲聞。 因聽而致之, 自分別己體, 是則空自然, 能了此虚無, 則無起不生。 若無所興隆, 則解此聖道, 是則謂聲聞。 今群黎聽法, 無形不可得, 計心言本淨, 是者莫有人, 聽此為聲聞。 滅盡則亦空, 猶如幻化生, 若有覩眾想, 了之為聲聞。 又聽所施與, 法施不可念, 是軌為聖路, 爾乃成佛道。 隨其本所種, 獲果亦如之, 成大道無念。 不可思議施, 衣食施薄福, 法施為最廣, 此則聖慧淦。 未甞有悁惜, 弘無想之心, 布施不有著, 如是惠施者, 疾致成佛道。 釋去一切心, 計耳無所聞, 超度諸合會, 故謂為聲聞。 因呼有響應, 假使不著音, 則於眾聖尊, 佛法無有上。 諸可不聞響, 一切而無倚, 不二無若干, 暢音有聲聞。 令彼聞其音, 無數佛演法, 樂人成佛道。 計所聞如響, 善遊諸佛土, 所聞不以亂, 平等覺所處, 世尊無有上。 聽千三千世, 所住如虚空, 計人等猗寂, 若泥洹無形。 世人所著想, 計倚有四大, 泥洹為想念。 是則為虚空,

莫得計堅固, 解諸種如是, 本無生死者, 不滅盡塵勞。 萬物不究竟, 計人弗可得, 此諸法寂然, 未有覩眾界。 今黎民聽此, 夙夜亦如之, 彼不興眾念, 我化諸人聞。 使人得聽法, 如此為弟子, 所聞無所聞, 故歎曰聲聞。 雄人念往古, 聽受最上法, 親不分別經, 一切法一切。 講音無所偏, 救度一切會, 為眾人說法, 是則為聲聞。 清淨不放逸, 則講無為界, 諦觀無說法, 佛法亦如之。 想法不去猿, 佛之所講揚, 彼法亦不近, 是故無所猗。 所以謂弟子, 聽採隨此教, 勸化於群黎, 斯乃為聞法。 阿難!我是故, 講說聲聞化, 假號日弟子, 則菩薩大十。」

佛告阿難:「是故如來、至真、等正覺歎說菩薩為聲聞,當知是義 亦善權方便也。」◎

 \bigcirc

阿惟越致遮經緣覺品第十

佛告阿難:「何故如來頒宣菩薩為緣覺乎?於是菩薩目覩諸法。何 謂目覩一切法空?無有像類而不可壞,現在覺觀法不可滅,故謂緣 覺。諸佛經籍不可思議,曉了諸萌悉如泥洹。無有內外則不可獲, 一切諸法不起不滅。

「人之本際則泥洹也,所號本淨但著言耳,則無所有法不可逮,因 名演稱語無所達。所以者何?其言則空。口之所說不解已無,法本 之際、佛道之無,分別觀斯,故曰緣覺。

「自察色陰但是聲耳。此色陰者,計於色生唯有名矣,以離言聲則無有陰。其色陰者無身、無我。所以者何?因口作號,所言亦空; 不起不滅,所言自然。不著吾我、不得久存,況口言乎?目覩色陰 則為痛痒,痛痒陰滅則不有名;因口之說號為痛痒,痛痒陰身無 我。所以者何?所謂痛陰,其言則空,不起不滅。言不著身,則無所住,況於言乎?

「曉痛痒陰,即觀想陰;若寂想陰,則無思想;想陰號耳,無身無我。所以者何?口之所說思想陰者,其言則空,不起不滅。分別言已,不著自然。心無所立,何況口言?

「觀想陰已,則生死陰已滅行陰,則無生死。所謂行陰,無身、無我。所以者何?所號行陰,言其則空。不起不滅,但著言耳。不得久存,況口所說?

「觀行陰已,則有識陰。假使識陰惔然寂滅,則此識陰但陰聲耳。 所以者何?其號識陰是則空耳,不起不滅,其言自然。無所住止, 況言說乎?

「是五陰者,皆無所有。分別本無,故曰緣覺。所以者何?斯口之 言緣對而致,無緣不緣。諸因講說,有言無言。五陰之事於此一切 永無所著,不造眾因,故曰緣覺。」 於是,佛頌曰:

「目覩一切法, 分別知之空, 不著於諸色, 究竟莫有相。 現在觀此法, 解空知自然, 分別了澹泊, 不可得根源。 現在獲於斯, 曉五陰如此, 則為平等覺, 緣覺無思念。 眾生志無為, 其心不可獲, 本際無有起, 淨無無思議。 一切人不起, 觀見無所滅, 是謂為無為。 諸法無動興, 眾牛皆泥洹, 省察是所趣, 無人猶若影, 故曰為無為。 不用是名稱, 群黎為泥洹, 不起無所滅, 如口所歎詠。 敢可說悉空, 人不解非言, 是故為眾生, 示現說泥洹。 口所發假言, 無處亦無念, 因口而有訓, 求本不可得。 陰不在本際, 口言無所顯, 諸聲所稱說, 人際亦無念。 一切願泥洹, 本無及始際, 澹然無放逸, 則救有所將。

本淨遊平響, 眾生亦復然, 無形則空寂, 本淨無心念。 法本為若此, 假名而讚揚, 其源不可得, 所以有言說。 而可分別解, 不以諛諂事, 其際則空無, 便了眾生本。 其言不依講, 口言無所顯, 諸群黎如此, 則不著人本。 所發陰則空, 其聲無所別, 其說亦如此, 而際亦復然。 其無諦如是, 覺已無所念, 是則平等道, 緣覺無思議。 覺了於本色, 此但陰聲耳, 寂滅斯色陰, 則無有言聲。 自然釋之去, 是則曰無形, 吾我既自然, 覩之無有處。 因言謂之陰, 色本不有身, 不起亦不滅。 其聲皆歸空, 因口而告言, 求本不可得, 其說因癡興, 號之謂色陰。 現在觀識陰, 諸聲無所有, 此陰以寂滅, 則無有響陰。 於此猿離身, 所謂吾我者, 計已自然空, 未甞有堅住。 口之所緣陰, 識陰則虚空, 不起無所滅。 口言本則寂, 若有所頌說, 察之悉本無, 無點之所言, 故演為色陰。 諸音無有說, 其限不可得, 不起無所滅, 無處而不決。 無塵勞侵欺, 亦不造諸法, 不執無所捨, 莫調不泥洹。 不有所覩見, 彼亦無寂滅, 不樂施欲埃, 不怠不精進。 不亂不一心, 彼亦無守戒, 非物可成就, 何故當持禁? 五道非有念, 無思亦如斯, 不恐無所畏, 不脫而不縛。

雖講無所演, 是為色所入, 一切法音然, 無獲莫著言。 無盡之法說, 現在遠是覺, 則無諸響聲。 以成是三昧, 響之等如稱, 目自分别此, 無言不有著。 諸法亦如是, 曉了因緣者, 知音無所有, 是謂為緣覺。」 故號平等道,

佛告阿難:「菩薩大士現在分別有明無明、是行非行、有識不識、 色與不色、六入無入、諸習不習、痛痒非痛痒、恩愛莫愛、不受捨 受、有與不有、生若不生、老病死患,一切自然察之本無。如是觀 者,故曰緣覺。」 於是,佛頌曰:

「現在了無慧, 未甞倚為明, 不成立有形, 若如水中影。 聰達曉諸義, 不著一切法, 假使不倚經, 是則慧者相。 明與身無異, 一切諸法相, 故曰為緣覺。 覺了此緣趣, 所號身之行, 其驅無所浩, 永不有內外, 則招生死體。 終始猶芭蕉, 非根無有貌, 不起莫有滅, 等譬如虚空。 現在曉了此, 則勇猛菩薩, 斯號平等聖, 緣覺如無念。 分别一切法, 寂行如幻化, 其識自然爾, 現在曉了之。 忽然解斯心, 知識行如之, 諸所道示想, 明識諸法空。 分別識其然, 一切無所著, 了如是法者, 知識亦如幻。 所可號名色, 身及諸音聲, 眾貌空不成, 是謂自然相。 心馳騁六情, 如幻化無言, 現語非音聲, 計自然悉空。 久遠來習之, 因發諸入處,

彼則分別習, 名自然如空。 游念起眾更, 習以成悉無, 若曉習本寂, 則知法無住。 日親習自然, 想眾更悉寂, 不興凶罪殃, 故曰為緣覺。 曉了諸痛痒, 皆空如本淨, 譬如泡起頃, 志敬空無形。 斷除眾恩愛, 則從無著法, 情欲已永盡, 故曰為緣覺。 若受而不受, 則空無有有, 非形何成就, 譬之如野馬。 吾無所興想, 身牛亦如是, 無根非有形。 計本自然生, 則不畏當終, 以離紀滅法, 未當復成身, 一切得自在。 現在獲此慧, 永無有著者, 又緣覺之音, 則造菩薩行。」

佛告阿難:「如來、至真、等正覺以是之故,讚揚菩薩為緣覺也, 亦當知是善權方便。如來用是之故光耀菩薩大士,持信奉法八等道 迹,往來不還,無著聲聞緣覺也。」

阿惟越致遮經釋果想品第十一

賢者阿難而說偈言:

「世尊所演說, 假號名泥洹,喻之若虚空, 度於無所有。 雖有所講說, 則非以辭言, 諸佛行善權, 合集說法耳。」

於是,阿難說此偈已,前白佛言:「惟天中天!其世人民不解如來、至真、等正覺隨時之化,則自侵欺,不了如來何因分別菩薩大士持信奉法至于緣覺也?」

世尊告曰:「若有明者,於過去佛積功累德,心開意達,不見侵欺。所以者何?曉了諸法譬若幻夢影響、野馬水月。所以者何?菩薩大士分別此慧,則不自侵;慇懃修學如來之法,精進不懈,則不自枉。」

佛於是頌曰:

「世尊之所讚, 讚揚於聖道, 是故之因緣, 菩薩行勇猛。 少智懈怠者, 不能解此義, 故當修精進, 如來以此說。 道意所遊生, 世尊有開化, 清淨之明哲。 故分別此慧, 彼解道意者, 知聖不可獲, 若致得知軌, 心覺五事空。 空者不知空, 寂定非不言, 悉除一切音, 故讚唱空法。 捉空無所得, 未甞能獲者, 假使不可持, 則知為空義。 設有解是五, 分別了空慧, 成得無放逸, 則不自侵欺。」

爾時,五億比丘志懷持信,即從坐起,住世尊前,叉手自歸,異口同音而歌頌曰:

「今世尊大聖, 蠲除諸狐疑, 平等覺所宣, 志立于大道。」

復有五億比丘閏是之說,皆悉奉行,悉住佛前,等心頌曰:

「唯世之光耀, 吾今離猶豫, 聖尊之所歎, 分別佛大道。 志願奉法迹, 正慧無罣礙, 道德自然成, 開化諸十方。」

復有千億比丘懷八等想,聞此歎頌,即從坐起,叉手而立,俱歌頌 曰:

「志所懷八等, 今則釋疑網, 心已分別了, 所因見八等。」

復有十億比丘懷道迹念,自從坐起,叉手而立,同說偈曰:

「導師及吾類, 以獲致法明, 乃知平等覺, 所因演道迹。」

復有二百五十萬比丘志懷往來心,則從坐起,叉手自歸,同歎頌 曰:

「我等本依倚, 志懷往來心, 今日永無難, 存亡無放逸。」

復有五十億比丘懷不還想,而說頌曰:

「導師尊無上, 今日無調戲, 永捨諸果想, 致聖導光耀。」

復有三十五億比丘懷無著想,興立四禪,即從坐起,叉手說是偈 曰:

「今吾不猶豫, 逮致無餘法, 解諸乘平等, 譬之若如幻。」

復有五十八億比丘意懷聲聞,即從坐起,叉手而立,則讚頌曰:

「吾等犯斯言, 意欲度眾生, 所演謂聲聞, 今日乃達知。」

復有五億比丘即從坐起, 興緣覺想, 叉手而立, 同心頌曰:

「今日乃目覩, 緣覺之所因, 世尊分別說, 緣覺無思想。」

復有百萬比丘尼,謂成道迹、往來、不還、無著果想,即從坐起, 叉手而立,說是頌曰:

「吾了平等法,則捨女人身, 各各成佛聖,當為世最上。」

復有八百八十萬清信士、清信女,悉懷道迹想,往來、不還念,即 從坐起,叉手立佛前,心同意等,俱共頒宣而頌曰: 「吾等念心淨, 譬如琉璃器, 於是當捨家, 興佛之法教。」

復有六十億姟彼諸天人,住于虚空而雨天華,散於佛上俱供養世尊,即下叉手,立於佛前,而歌頌曰:

「吾本懷諸乘, 果想亦如是, 今日以永除, 覺成無上道。」

阿惟越致遮經降魔品第十二

于時無數百千比丘——舍利弗、目犍連、須菩提、阿難律、離越劫 賓奴等——從坐起,叉手而立,白世尊言:「吾等今日聖道具足, 不違大意,降棄魔怨。備究五逆,得悉五樂;成就邪見,捨離正 見。吾等今日已害無數萬千人命,悉成佛道,至無餘界而已滅 度。」時世尊默然。

於是,眾中無量百千諸來在會,聞此所言而皆狐疑:「此謂何乎?義所趣耶?」心懷瞑然,如阿羅漢乃興此言,豈況凡夫?住者直立、坐者默坐,不能起立。

賢者阿難承聖尊旨,悉知無數百千諸眾心之所念,問文殊師利曰:「聞耆年言,會者皆疑。不審所論為何歸趣?又佛世尊默然不言。」

文殊師利乃曰:「唯仁阿難!此經名曰『不退轉輪菩薩之地』,是 耆年等所可講說、諸得不退菩薩大士目覩信耳。」

阿難又問:「耆年何故說此言耶?世尊默然。此耆年等於無上正真不退轉也?」

答曰:「唯然,當成正覺,不復迴還也。」

文殊師利謂賢者阿難:「無黠之行,則曰其母。是諸人者,究盡除害,無善思想,貪著情色。斯則為父,除不善想,遠諸情念,至無著意。釋凡夫法,洗蕩不淨想別聖俗,碎破眾念不壞大法;興如來意以除諸想,於一切法無所從生。是故,耆年講說此語:『吾等今日具足五逆。』所以然者,逆無往反。耆年所言成五樂者,察其五樂皆如夢幻影響野馬。了知此慧,行無缺減,則為五樂。所以者何?無有根本,設無其源,則為盡除。乃應平等,講具聖慧,即逮法忍,此者名曰五樂備足。

「耆年所說:『吾等今日得離正見、住邪見』者,覩一切法皆處邪見。欺哉諸法詐妄至誠,盡無所有。譬之虛空,非有像貌,虛實去來,悉無歸趣,不可將護。所以者何?其本自然,計此諸法則皆平一。如諸法等,邪見亦然,此比丘輩非等無邪。所以者何?以離諸想致佛聖道,獲眾覺法,飽滿經義而無所得。是故,阿難!是諸比丘悉共說言:『吾等今日具足邪見,釋於正見。』

「此耆年等所謂:『今日吾等害無數百千人命。』說斯語時,不可 計無數千萬人神聞之諸法。譬若如幻夢影響野馬,蠲除人想,無有 吾我,遠壽命人,超眾德本,發大道意。無所殖種,興修道義,及 餘比丘、比丘尼、清信士、清信女,捨我人壽。無身之想,不復頻 更終始之患。所以者何?無我人想、不盡想,永盡無餘,逮致究 竟,不起法忍。故說此言:『吾等今日害無數百千人命。』

「斯諸耆年屬者所云:『今日吾等逮得佛道,致無餘界而滅度』者,開化無量億百千人命,棄眾塵埃令獲聖道。所以者何?皆發無上正真道意。說此語時,悉逮無所從生法忍。以故諮嗟,自讚頌言:『今日我類拔去情欲、成佛道法,無塵勞形,除有餘穢,故謂我輩今獲大道於無餘界而滅度矣。』

「是賢者等,以在大乘,不願在天。惟仁阿難!族姓子、族姓女發無上正真道意以起俗事,其心清淨,不為俗法之所繫縛。乃應發心越一切義,道捨諸想,究竟經典,則無餘界而滅度矣。是為,阿難!習菩薩乘、行菩薩者,不習日行。愚騃之人隨日念耳,非明智者。所以者何?設無此誠信要御諸天宮殿,則無光明,便無出入;過去無晦,則無晝夜,便不思想。愚冥之人興晝夜念;菩薩大士寂修大道,習善知識,無有穹志晝夜想也。所以者何?永除眾念乃致佛道。」

於是, 文殊師利則說頌曰:

「所謂不懷施, 愛己計有身, 彼若不斷除, 則謂不可搖。 分別於瞋恚, 自然不生想, 聖道以無處, 彼則不可動。 所可敷母者, 終始所由生, 拔去此根無, 則謂為害命。 不順念為父, 所樂情欲法, 是等解本無, 究竟莫有根。 化之歸無身, 不知明所趣, 不動無所住, 向者故說此。 所修羅漢法, 凡夫法亦然,

諸可盡愛欲, 向者故說此。 察吾我自然, 大興有為想, 諸法無所懷, 則無音聲說。 古昔之所念, 如來之所知, 則謂無從生。 即拔此根株, 等同而無二, 以捨是想樂, 假使曉了斯, 則謂平等教。 所言五欲樂, 俗人讚此五, 蠲除非常想, 念之如幻化。 具足不 少 少 , 則懷愛欲無, 以故此等類, 世尊前歎之。 分別諸罪福, 譬之若如夢, 究竟無從生, 其慧曉了斯。 空寂無能固, 識邪瞋恚法, 邪見為欺哉, 彼分別妙智。 一切法不實, 莫有折法者, 虚事不可倚, 如虚空無處。 普解親一切, 故難為正見, 此法則平夷, 了慧見正等。 厥愚冥之人, 起人想則沒, 則無有死者。 索人不可得, 無量人起生, 則捨壽命想, 便以無眾念, 計命者罪重。 蠲除眾生想, 非有計壽念, 以故說此言, 吾害無數人。 捨諸塵勞埃, 法無應不應, 解道無形貌, 則無所壞除。 降伏諸魔力, 逮清淨道法, 諸法莫有諍, 不起不有滅。」

時文殊師利說此偈已,應時五千懷狐疑者心開意解,獲大光明,而得具成有起無所從生法忍。各取身衣供養奉上文殊師利,同時說言:「願令吾等致是法慧。所說若斯,開化群黎,分別深慧,無所罣礙,亦如仁者。」

於是,世尊讚文殊師利曰:「善哉,善哉!斯最妙勝!決諸疑網,近佛聖籍。」

賢者阿難前白佛言:「文殊師利何所開化,而今世尊讚之如是?」

世尊則曰:「文殊師利誘化無數百千人類令入大道,悉解了此深經之義。」

阿難白曰:「唯然,世尊!講不退轉輪入聖軌乎?」

佛言:「如是,阿難!講不退輪興化大道。所以者何?文殊師利則 是善友,導利群黎。」

阿難又問:「唯天中天!今此比丘立佛前者,悉懷持信奉法之念, 八等道迹、往來、不還、無著、聲聞緣覺之想。此輩之類發大道意 耶?」

世尊告曰:「是輩懈廢,羸劣心曚,無愷悌志,難可開化。

「慢懈不進,意在衣食,非習深法,慕于法利。興有為事憒閙之緣,感於八等迷惑卒暴,而不安詳,諸根不定。放逸其心,貢高自大。志計有身及壽命人,不捨眾瑕,犯戒貪嫉。想求佛法,悉從惡友,樂于邪智,不肯奉受。智度無極,順從外緣,貪利財色、衣食之樂。古今以來,夙興夜寐而不專精進,違失道義;兩舌、惡口、妄言、綺語,其志懷害、轉共諍訟;重于罪福,不信空、無相、不願之法。蠲於眾行不起不滅,壞一切法永無有想,此之謂也。」於是,佛默然無所加言。

賢者阿難承佛威神,問文殊師利曰:「何故世尊默而不言?」 文殊師利報曰:「最於後末五濁世時,人法如是,不信深經,佛故 默然。」

阿難又問:「頗有信者悉不信乎?」

答曰:「信者少耳。譬如阿難明智者鮮,愚冥人多。所以者何?不 樂修行,以故不了。如是,阿難!其聞是法鮮有好喜,多不欣樂。 設有信者,為眾棄捐,不見恭敬。所入郡國縣邑墟聚,諸人忽笑。 所以者何?宿罪由致,陰蓋所覆,本功德薄。」

阿難又問:「向者講說,少有信者,義何所趣?」

文殊師利答曰:「是輩之類則為捨佛,不信大道。」

阿難白佛:「唯願演之。樂者雖鮮,聞佛所說,悉當欣踊。」

爾時,世尊周觀四方,便出其舌覆三千大千世界。因從舌根出大光明,照恒沙等剎。時四部眾承佛聖旨,目覩東方恒沙等國諸佛世尊 咸說此法不退轉輪,是<mark>間</mark>會者悉遙聞之,等無差別。

四輩之會覩斯變化,一切等心,異口同音,皆白佛言:「唯願大聖 遵崇所歎不退轉輪,如佛所言誠不異。吾等目視無量不可思議諸佛 世尊講斯深經等無差特,唯佛說之。」

於是,世尊還吶其舌,告阿難言:「厥妄言者,寧獲斯舌。」 阿難啟曰:「不也,天中天!奉至誠者,開化正義,積累功德,遵 無數劫,闡于大慧,乃致此耳。是故,聖尊!惟當說之。設族姓子 有信樂者,學雖寡鮮,聞是說已,覩其明證,即當欣然興之不廢。」

佛告阿難:「一切四輩未遭斯典,志於髣髴。比丘、比丘尼、清信士、清信女、天、龍、鬼神、阿須倫、犍沓和、真陀羅、摩睺勒聞是經籍得不退轉,當至無上正真道最正覺。而於此土講於法義,等無有異,如我今也。」

爾時,四輩及天、龍、鬼神欣然大悅,疑網永裂,皆手擎華香共散佛上,諸有女人下身寶瓔以散佛上。心同意等,普白佛言:「今日大聖如來、至真、等正覺乃無二言。」

佛復告阿難:「實如所云,誠不有異。如來所演,實無二言,除諸 瑕疵、愚冥之貪。假使慧覲佛天中天,則獲如願。」

阿難問佛:「何謂慧覲佛?」

世尊問之:「汝不解之乎?」

答曰:「不敏。安能及之?眾祐!」

告曰:「假使有人聞能仁佛,皆不退轉成佛聖路。所以者何?佛道普慧,有益無損,除貪、恚、癡,豈況一華奉如來乎?吾滅度後,若持舍利供養自歸,悉得如意。」

阿難又問:「精進不疑、專心聽經,皆不退轉,當成佛耶?」

佛言:「其有人聞能仁佛,皆當逮得無上正覺。所以者何?設不爾者,佛語為異,則有二言。」

佛問阿難:「如拘類樹蔭五百車,若五百眾處在其下,悉荷覆蓋, 其種大小?」

答曰:「甚小。」

佛言:「阿難!如拘類樹其種小小,溉灌時節稍稍長大,而布枝葉廣覆四遠;況篤佛道,聞聖尊名?亦當如是斯種德本,漸修其行, 非壞不腐,至於無上正真之道。所以者何?此一切法殖種之源永非 猗住。群萌本無,故不有敗;一切法種無所倚演。」

阿難問佛:「唯佛說之是聖本願,諸佛世尊道法然耶?」

佛言:「本發意願,其聞我名悉不轉退成最正覺;諸佛之法皆亦應 然。所以者何?諸佛法等。」

阿難又問:「設使等者,何用願乎?」

佛告阿難:「菩薩大士聞說斯經,假使發願或不興願,會當證明逮 聞是法。」

阿難白佛言:「未甞有,世尊!斯法微妙,諸佛世尊乃以大慧開化 群黎。」

佛言:「如是,如是。阿難!諸覺洪明多所開化,立于聖旨。吾於 佛土慈愍蚑行喘息之類,不惜身命;一切所有施而不悋,精進不 懈,於一切法而無所著;行菩薩法,積功累德,欲救眾生,修深經籍,乃得佛道。」

阿難問佛:「難及,世尊!今說此經,弊魔不來廢亂學者,不令興 德發于無上正真道耶?」

佛言:「魔不聞之。所以者何?文殊師利神足之變也。」於是,文殊師利即釋威神。

時魔波旬遙於虛空聞講不退法輪之聲,聽能仁佛所說法言,心懷恐懼,衣毛則竪,口說此言:「以得勝我,共於力勢以空余界,無復國土。」愁憂涕淚,老極憔悴,譬如百歲男子朽耄。時魔波旬體變如此,四部兵合集三千大千世界各各異魔及魔官屬等類諸天,往詣佛所。兵仗嚴整,眾魔之威,逼加菩薩。初成佛時,現於身老,執杖戰病,面皺皮緩。置四部兵,住於虛空,普共遙聞不退轉能仁佛音,心悉得定。

時魔自知非我所有,孤獨一身而無侍從,直前詣佛,白世尊曰: 「今吾一身都無侍從,羸瘦老極,無將扶者。又無力勢不能自勝, 以空我界非有國土。如來大慈,咸哀眾生,亦可憐我。世尊!盡度 永空吾界,而無扶我,給授水漿。」

佛告魔言:「人種甚多,不可思議。假使諸佛日日興盛如恒沙等, 發起無量不可稱計億百那術眾生之類,人種不盡。」

魔白佛言:「唯然,世尊!人種雖多,今吾孤獨,不有徒使,無扶接余。假令行道忽極躄地,不能自起,願見安撫得歡喜悅。唯願世尊哀速撫育,使眷屬興。」

佛告魔言:「且自安志。不聞斯法離於信者,悉是汝伴。」 魔即歡喜善心生矣,意與口言:「吾當化人,雖聞是法,令不信 樂。志懷狐疑,已有猶豫,必從我教。」

時魔波旬復白佛言:「惟願加哀,弘以大慈,重見慰撫,令吾踊躍無有憂臧。佛向者講:『聞能仁名悉不退轉,必當逮成無上正真之道。』願聖默然,勿宣是旨。是群萌黨聞便加精進,立于大道。」佛報魔言:「汝且安心,勿得懷懅。當令眾生不立道意,存於人種,人人各安,使不動搖,不震于色、痛、想、行、識。佛當開導不離邪見、非立正觀、及六十二諸所疑惑;一切無動,不念過去當來、今現在;非離害群生、殺盜、姪嫉、妄言、兩舌、惡口、綺語、及嫉恚疑。亦不勸人入于正道;亦不化人於布施、持戒、忍辱、精進、一心、智慧;亦不教人導奉四恩——惠施人、爱利人、等利一切、救濟合度。無所猗動,不想人種,無念父母、兄弟、妻子、及與男女,釋除親友、夙夜、日月、一月、半月諸動之想。波旬且安。吾當勸人令除六度無極思想、及大道意力、無畏根力、覺

意八正之行,佛法聖眾及一切智道義之想,化諸群黎,於一切法使 不動轉。」

時魔歡喜不自勝,即於其處顏色窈窕、面目光澤。華散佛上,遶佛 三匝,則偈說曰:

「平等覺世尊, 吾心本欣踊, 正覺言無特, 所造必如意。」

於是,魔波旬說此偈已,即還天宮,與諸眷屬五樂自娛,不復憂感發大意者。

世尊說此降魔品時,三千大千剎土六種震動。阿難白佛:「今魔威德地大動乎?」

佛言:「講是降魔品時,六萬四千人得不起法忍。」

阿難又問:「寧有狐疑不了者?」

世尊曰:「向者見此,悉懷疑結,心各念言:『余以聞之,此語何謂?何所歸乎?』不復相見。」

阿難白佛:「惟願世尊速為眾會現大光明,決其疑網。所以如來為魔說之:『波旬且安,吾化群黎使不住道,於是眾生界而不動搖。不發道意、無倚智慧,不捨邪見、不處正觀,於六十二疑而不轉移;亦無去來、現在之想;非離殺盜、貪婬、妄言、綺語、兩舌、惡口、及嫉恚疑;令不施與、戒忍、精進、一心、智慧;不順父母、兄弟、妻子;無有晝夜、一月、半月,離是眾想亦非動搖;令不奉六度無極、及無所畏根力覺意佛法聖眾、并一切智,使不轉移。波旬且安,吾當開化一切眾生,使不動義、不立於行。』唯然世尊!所因講斯速分別之,使此會者無餘疑結,心開意解;及於後世邊地諸國,遭值聖明,稟受經典,持諷誦讀,勿復猶豫。」爾時,世尊則說頌曰:

「聖道無所住, 慧軌非有處, 說此大義時, 人解及應告。 塗及一切人, 無二不有處, 佛以是故說, 今覺非有處。 莫能動眾生, 人種亦如之, 一切不有形, 至竟無所獲。 群黎類皆空, 人界不可思, 彼則普無念, 曉了一切慧。 眾人不可動, 假名日身命, 四大而合成, 此滅度空寂。

分別五陰空, 自然不有動, 設總而不移。 滅度不可獲, 陰止無所震, 曉了不吾我, 離形寂然空, 究竟非有著。 身與五陰同, 衰行亦如之, 無行以為行, 諸陰循虚空。 所謂寂定界, 不起亦不生, 斯諸陰蓋入, 未能傾轉者。 計己身吾我, 其法莫搖者, 尚不獲曷震, 故佛說此言。 眾生不侵欺, 計本不可得, 自然不可獲。 逮之而無心, 所可云諸見, 凡有六十二, 無自然如斯, 猶如水中月。 其六十二見, 譬之若如影, 自然不動震。 離有形無我, 過去當來想, 現在亦如之, 譬之如野馬。 諸想無處所, 是法空無念, 計人不可得, 諸眾生無處, 則不可動搖。 其人喜殺生, 由入大曠野, 立志於滅度, 故不可動搖。 雖轉於眾生, 彼則無所有, 計日不可得, 則日而不動。 說道有過去, 未甞有牛者, 佛以了故說, 人而不可動。 假使殺生者, 法施無思議, 以乃成道慧, 彼則不可動; 所謂邪婬者, 愛欲無可得, 以故分別說, 彼則不可動; 起者不有脫, 其妄言之法, 精進而獨尊, 彼則不可動; 讒言亦如是, 兩舌及惡口、 觀一切諸誨, 如幻如無形。 皆無有處所, 不可有所倚, 諸陰譬如響, 其念莫有者。 愛己計有身, 所謂不懷施, 聖道以無處, 彼則不可動。

分別於瞋恚, 自然不生想, 則謂不可搖。 彼若不可斷, 奉修於正法, 曉了眾邪見, 超度諸有言, 彼則不可動。 離勸助智慧, 一切寶清淨, 愍哀著色財, 蠲捨眾惡罪。 捨遠於聖道, 所見及奉戒, 智慧不興此, 莫求於正直。 異學懷邪心, 斯外諸忍辱, 等求平等道, 不倚於無為。 精進于三事, 異道之明說, 是不歸聖慧, 此謂明智行。 多修於三昧, 倚一切諸想, 非佛之所歎, 亦不勸助彼。 非明哲之稱, 愛欲之瑕病, 得不興眾想, 佛慧不可量。 攝取眾生類, 菩薩行勇猛, 雖受無所動。 則為說此義, 寂除眾生想, 則發菩薩意, 道意無所起, 彼則不可動; 思父母兄弟、 姉妹及男女, 一切猶如幻, 彼則不可動; 一切是諸念, 計之無所有, 群黎法悉空, 彼則不可動。 其夙夜之想, 一月十五日, 一切除想念, 譬如野馬水。 布施奉禁戒、 忍辱精進想, 一切於此念, 是諸想不動。 定意之智慧, 菩薩之道力, 修於無所畏, 釋除諸妄念。 免去聖軌慕, 覺意及思道, 明智未甞動, 不為諸想惑。 佛法之所求, 如此眾聖想, 無有若干念, 言行之所動。 道想之所依, 佛慧無罣礙, 則為遠佛道, 佛聖非思議。」 佛分<mark>別</mark>說化魔品時,十億之眾壞除疑網,成就大明,逮不起法忍。 得法忍已,一切同心,說此偈言:

「弘道之尊聖, 佛軌忽無思,

為吾等大師, 道勗斷狐疑。

具一切光明, 使住佛明道,

其耀照十方, 目覩億千佛。

普見眾庶元, 於色無所著,

蒙世尊之恩, 吾等法眼淨。」

爾時,百億人眾各脫身衣以覆佛上,供養大聖,則歎斯言:「令一切人逮聞此法,光明具足,所願必獲。」

阿難白佛:「其有聞是開化魔經受持諷誦,為得何福?」

佛言:「其福大浩。」

阿難復問:「何謂為浩?」

佛言:「若善男子、善女人則旦供養百佛,日中晡時、人定夜半、 天曉肅肅,各各供養百佛世尊。一日一夜中合六百佛,一切所安隨 其所宜。如此比像具足千歲,其福多少?」

阿難言:「福大多大多,天中天!不可為喻。」

佛言:「假使是分別魔經受信不疑,德禍於彼。」

佛說阿惟越致遮經卷中

如來品第十三

爾時,三菩薩各從遠來,見此變化,佛所演法,得未曾有。阿難白佛:「此三菩薩從何所來?」

世尊告曰:「東方去是恒沙等剎,有世界曰身超須彌山。住在本土,聞說斯經,故來到是。」

時三菩薩來住佛前,皆以香華供養世尊,俱白佛言:「余等僉然信樂斯法,不懷狐疑。所以者何?心中㸌然,譬如目覩。如來、至真、等正覺恩之所覆。」

時一菩薩前白佛言:「如我所言,至誠不虛,吾於是經都無狐 疑。」第二菩薩復白佛言:「余於此法亦復不疑。」第三菩薩復白 佛言:「我之所言至誠不虛。所謂佛者,吾則是佛,曉了斯經,無 有疑網。」

爾時,眾中無數百千諸來會者悉共叉手,不樂本座:「佛興於世, 此徒何故乃宣斯言?」其餘眾人各各默聲,各心念言:「今佛現 在,自當分別。」

阿難復白佛:「此等菩薩皆號云何?」

佛告阿難:「一菩薩者名得如來住,第二菩薩名志得世尊音,第三菩薩名志逮得佛聲。如是,阿難!如彼所言,等無有異,其義趣此。」

阿難白佛言:「今此無數百千之眾擾動不安,悉各叉手,一心向佛,不知斯義為何趣也?」

「是輩功德轉當增加。譬如男子,端正殊妙、顏貌潔白,淨水自洗,以栴檀香熏浴其體,著好衣畢,其人體色益自光耀。是輩功德信樂大道,叉手向佛,福轉難及。」 佛爾時說頌曰:

「如來知過去, 當來亦如是, 見諸法本無, 故曰為如來。

見諸法本無, 故曰為如來。 悉達現在事, 未來悉覩喻,

不造立三行, 究竟如無想。

如往古諸佛, 所覺不可計,

無從來一等, 故曰為如來。

如往古諸佛, 所猗求聖道,

覺者亦當然, 故曰為如來。 諸法本所立, 道聲寂然定, 故曰為如來。 音歸不可得, 專應過去戒, 當來亦復然, 現在獲本無, 故曰為如來。 如勇猛忍辱, 為菩薩之人, 彼學亦如是, 此人則無上。 獲勤力如是, 本為菩薩時, 故曰為如來。 志所行精強, 如諸法平等, 所說無特異, 不著念在有, 故曰為如來。 平等不有念, 常自然等正, 無有平等想, 非思莫發念。 具足此音聲, 本無成三昧, 遵修於定意, 故曰為如來。 諸法悉本淨, 本無不有處, 一切無所稱, 因緣不有形。 曉了智慧相, 明空法亦爾, 至誠無所疑, 智慧度無極。 如聖之所度, 埭本無思議, 彼明不可得, 則無量滅度。 猶獲智慧爽, 過度亦復然, 以是慧無處, 故曰為如來。 佛道不可獲, 如意之所念, 不得一切法, 故曰為如來。 假使多所逮, 獲致於無為, 諸法非有數, 歎道不可限。 無有修軌迹, 世尊之威耀, 悉從智慧興。 彼道則雅諦, 各分別如是, 道尊如無漏, 塗志應自然。 彼道則正真, 有曉了聖化, 法所御平等, 故曰為如來。 將令至本無, 聖與平等同, 所住順明軌, 道與身本無, 故日為如來。 今吾講說法, 聲平等如是, 假使住於斯, 爾乃求大道。 我是故,阿難! 口出是語耳,

此事如所言, 則為識之行。 曉了不退轉, 則勇猛菩薩, 故以修精谁, 讚揚其義耳。 阿難!是因緣, 菩薩志所演, 所以謂如來, 勇猛菩薩智。 順此諸因緣, 其法為何類? 何因謂世尊? 菩薩修無畏, 講道億百劫, 所因成大聖, 佛道無思念。 成就慧明跡, 皆自為身求, 永覩無所畏, 未掌懼生死, 故曰為世尊。 終始無所立, 以是度群生, 故曰為世尊。 何謂畏生死? 云何住終始? 何因度眾生? 世尊最上覺, 無道利法者。 法亦不有壞, 非堅無有散, 是不畏生死, 度人勤苦患, 此非住終始。 度群黎如此, 故曰為世尊。 未曾 懼諸法, 永不畏諸義、 及一切佛經, 令聞無數法, 非底不有邊。 眾生法悉空, 諸佛道自然, 不覩諸法本, 即依順此經。 專精於諸法, 智空法自然, 不恐無所畏, 曉了道慧空。 知諸法侵欺, 分別無所猗, 精進次第演, 則解諸法本。 棄捐眾惡道, 晶勉一切難, 未甞有恐懼, 免眾生惡塗。 過度億人民, 越終始大懼, 常不動生死, 爾乃度群生。 至上尊無為, 過之度彼岸, 得致號之人, 故曰為世尊。 為人分別說, 說法猶虚空, 亦不有畏難, 故曰為世尊。 因依一切法, 多所而開導, 道平等無異, 聖則不可獲。 眾生等於彼, 則逮成佛道,

分別說如此, 則無所畏難。 開化閉鬲人, 度無數群生, 超越諸所畏, 故曰為世尊。 釋去諸人想, 專修于道念, 拔除群萌志, 故曰為世尊。 得離眾思想, 菩薩無所慕, 以故得號字, 則亦謂世尊。 寂滅致等法, 曉了一切義, 當來所立志, 則亦謂世尊。 彼亦不求名, 不求上妙道, 若脫無為稱, 為人講經義。 道捨眾憍慢, 則不有立願, 人求尊名稱, 則不慕佛道。 計音如響等, 因興眾想念, 貪著虛偽聲, 我名譽乃爾。 不存一切響, 口言無所著, 菩薩不放逸, 故曰為世尊。 如是譬像法, 大聖所說音, 假有菩薩號, 故曰為世尊。 莫不洣惑者, 以故當了之, 至誠求佛道, 無數無有漏。 是緣乃餘事, 歎說世尊音, 阿難!知隨因, 而號為菩薩。 口出此語耳, 我是故,阿難! 所緣諸明智, 佛號為世尊。 覺了眾塵埃, 未甞為之惑, 平等覺除欲, 是故號曰佛。 何以為世尊, 顯示斯名號? 而講說道法? 易從言白佛, 佛法無所有, 曉了空寂滅, 一切無有著, 故號字為佛。 覺了體悉空, 見體無所屬, 身不可久得。 彼不有堅固, 愚騃離慧明, 不要謂常要, 故號曰為佛。 覺此悉本無, 自然不有形, 分別無明慧, 埭得大聖智, 故名曰為佛。 過去所興想, 分別學無想,

曉眾想無處, 不為念所惑。 覺知往古色, 無牛不有處, 愚者為想惑, 計色無所成。 分別色本無, 不可得根源, 不著一切法, 則無有痛痒。 曉想譬如幻, 無物不有形, 已分別斯慧, 一切法如是。 總持無所行, 一切身無古, 故身不可得。 空義非有御, 人身不堅要, 若如芭蕉樹, 悉分別此義, 故號曰為佛。 其識自然空, 計身無有內, 識之何等類。 外亦不可獲, 覩識無所有, 一切法亦然, 不得處形貌, 究竟不可獲。 識之所知然, 計本悉等寂, 若了曉想者, 則莫有所見。 明不作是觀, 一切人亦然, 群牛萌類同, 以故無能知。 自然不有啟, 諸法無所行, 人法亦俱然。 一切莫有受, 覺了未甞生, 一切法忍禍, 故號曰為佛。 無若干放逸, 曉了佛眾經, 所經如正諦, 故名號曰佛。 一切法無處, 如空諦法爾, 所覺經本無, 猶佛道無異, 莫能得根本。 從始發意來, 所因志大道, 諸法無所獲。 則了不有志, 何緣發其志, 而慕求聖道? 覺了無形類。 其心與道同, 吾以故,阿難! 演出此經耳, 所因講聖軌, 吾為佛道師。 以斯法像類, 其音號曰佛, 假使作彼教, 乃為求佛道。 則得折正道, 其知是法者, 一切法如是。 不復懷二心, 不疑佛經籍, 則致世最上,

若解此講者, 普說法若斯。」

佛分別說此如來、世尊、佛義之時,則無央數百千人眾前白佛言:「吾等除疑,無復結網。所以菩薩因由得名,號之如來、世尊為佛。曉了此法,自逮見心,一切法空,人為之惑。父母、妻子,戀恨、恩情,如來手授深妙之義,其心堅住不復輕發。了不動法,如空不搖,無能震者。如是,世尊!一切諸法無所轉移。所以者何?諸法如空。」爾時,無數百千之眾稽首佛足,遶聖三匝,則還復坐。

阿惟越致遮經開化品第十四

爾時,有菩薩名諸根常悅,說是頌曰:

「眾人興果想, 救濟于異念,

平等於實道, 稽首世明智。

常講說德實, 演果為平等,

得平夷正覺, 稽首世明智。

無數人貪果, 猗行眾生實,

佛悉度此等, 稽首世明智。

說法無差特, 所住而正均,

覺諸法平等, 稽首世明智。

人多慕德果, 勗勉令不著,

解脫眾顛倒, 稽首世明智。

所興德具足, 使眾堅住道,

成就一切德, 稽首世明智。」

於是,諸根常悅菩薩說偈讚佛已,遶佛三匝,去佛不遠瞻聖尊顏,不以為厭,心開意悅。

於是,蓮華首藏菩薩即從座起,蓮華散佛已,讚曰:

「眾人皆懷想, 度脫諸所著,

永離於恐懼, 稽首上能仁。

寂除一切處, 說法無境界,

英雄超諸受, 稽首上能仁。

尊解諸法空, 自然無堅固,

平等法越難, 稽首上能仁。

斷除諸根株, 眾生著塵勞,

勉濟使無畏, 稽首上能仁。 無恐而不懼, 為大師子吼, 超度諸境界, 稽首上能仁。 無有眾憂患, 感惱已永盡, 心除遠凶害, 稽首上能仁。」

蓮華首藏菩薩大士讚佛已訖,即白佛言:「若人行此,當為作禮。 最後世時,聞是深經,智慧明達,未曾恐懼。」

復有菩薩名離欲迹,前白佛言:「假使有人聞此深經歡喜信者,則謂明智,當以華香夙夜供養。」

復有菩薩號曰廣心,前白佛言:「說此經法尊興佛道,不疑此者德不可量,致供養利,其心堅固。信是經者,所願者得;其不信者, 為魔所固,則隨魔行。」

復有菩薩號曰蓮華目,前白佛而讚頌曰:

「若信是經者, 為世作眼明, 無有狐疑心, 指示人道路。」

復有菩薩名心信悅,佛前頌曰:

「聞斯經法者, 歡喜信為上, 是等之人輩, 則為世神明。」

復有菩薩號喜神靈,而說頌曰:

「其聞是經者, 信之而不疑, 為世之威神, 人中之上尊。」

復有菩薩名曰常感,前白佛言而說頌曰:

「若有疑是經, 當為興悲哀, 志在虛妄法, 則數數生死。」

復有菩薩名曰寶衣,而說偈曰:

「無數億衣服, 清淨善微妙, 疾化度尊長, 令未曾狐疑。」

復有菩薩名曰禪食,佛前說頌曰:

「其信此深經, 當為施美食, 一切味具足, 專精大聖行。」

復有菩薩名曰見人住聖,佛前說頌曰:

「其疑是經者, 當為興悲哀, 啼哭墮泣淚, 不信深經法。 或從地獄來、 或 還入惡道, 狐疑此像法。 用須臾之間, 不解深妙義; 為惡友所攝, 為疑網所縛, 以故歸非處。 則不順正戒, 觀瞋恚懷惱, 於是所住時, 喻之如凶獸。 既不修道術, 懈怠不精進, 信邪無智慧, 不信此典籍。 慕終始群生, 著吾我恩爱, 猗在三界患, 不信斯微妙。 懷害為愚冥, 著在欲所樂, 貪猗自見身, 誹謗是道教。 追逐美飲食, 志慕好衣服、 少存清白法, 故誹謗斯經。 人在樂欲界, 貪慕無德實, 其人則自遠, 不折於世尊。」

復有菩薩名曰棄惡法,佛前說頌曰:

「當棄是輩人, 譬如遠溷廁, 愚者疑此經, 猗界而求脫。 當共遠離之, 猶若死臭屍, 其疑深經者, 遠之當如此。 有人誹謗者, 如賊危聚落。 則住在冥處, 見惡意捨走。 觀此即當馳, 是賊凶、惡物, 若誹謗此經, 不見意無亂。 爾時,阿難前白佛言:「未甞有。天中天!是諸菩薩分別經慧,乃如是乎?因三昧力說是語也?承佛聖旨曉了之乎?」

佛言:「承佛威神,緣此經義,得三昧力逮至無為。所以者何?今 是住者族姓子等,於六十億諸佛聞此經籍,信樂讚誦;亦如於今志 三昧力,承佛威神講此經。所以者何?如彼所言,等無有異,則為 明證。」

阿難問佛:「其聞是經,即歡喜信而不狐疑,族姓子、族姓女得何 福祐?」

佛告阿難:「族姓子、族姓女志求無上正真之道,假使七寶滿此天下,施與如來。若復有人,聞此深經即歡喜信,非以<mark>狐疑</mark>,福過於彼。」

佛言:「置是滿天下寶。如恒沙等諸佛世界滿中珍寶,供養如來; 其聞此經歡喜信者,福過于彼。」 佛爾時頌曰:

「假使是天下, 七寶滿其中,

以供施如來, 世尊成諦慧。

智人聞是經, 信樂不迴動,

此福最為上, 其德不可限。

使如恒沙等, 諸佛界如是,

供養聖世尊, 不及聞是經。」

阿難白佛言:「族姓子、族姓女聞是經法而歡喜信持、諷誦,其福如何?」

佛言:「若族姓子、族姓女求無上正覺,百劫供養如來,布施、持戒、忍辱、精進、一心、智慧,又得五通,各各百劫曉了世間,無所復疑;不受此經,其人則為不供養佛。」 佛爾時頌曰:

「若具足百劫, 奉供養世尊,

飲食普備悉, 則不供養佛;

其受是經者, 則奉於大聖,

捨離猗道想, 法供養諸佛。

如此順尊教, 乃為奉事佛,

法供養等覺, 如來則法身。

假使滿百劫, 選擇好衣服,

奉世尊正覺, 此非供養佛;

其受是經者, 乃為尊恭肅,

此應奉事佛, 勝以衣被服。 若於百劫中, 明珠好華香, 進世尊等覺, 不應供養佛; 皆除猗果想, 設有受此經, 是則為供養, 世尊最上慧。 若起七寶塔, 為世雄興立, 皆高如須彌, 不為供養佛; 不自覩吾我, 假使受此經, 是供養最尊, 一切無有上。 有人奉禁戒, 若具足百劫, 不持此經籍, 彼戒無名聞; 其受是經者, 此戒大名稱, 若奉清淨戒, 此戒無有上。 無量不可議, 明智順是經, 其禁常備足。 因緣而奉事, 彼禁悉究竟, 不謂之毀戒, 其學是經典, 即當如上教。 則非求佛道; 其不學是經, 奉聖雖具足, 則亦無所學。 修戒如是像, 分別此經義, 其持是卷者, 禁戒則具足。 假使百劫中, 一心奉忍辱, 設有瞋罵者, 皆忍一切人; 若受是經者, 閏持而諷誦, 忍此最為上, 微妙不可量。 或斷手足者, 心未甞懷恨, 不厭不以劇, 其心初不起。 如是之忍辱, 行之於百劫, 遵行如是者, 此忍無有持; 若受是經者, **閏持而諷誦**, 此忍最為上, 微妙不可量。 若持此經卷, 其忍最為上, 則不有虛偽。 巍巍無等倫, 佛慧莫有上, 不斷至誠教, 非輕毀此經, 一切逮如願。 假使百劫中, 精進不懈怠, 夙夜興不寐, 一切得如願; 若修學此經, 講說成明智,

是精進為上, 勤修無踰者。 若滿百劫中, 為五通神仙, 不遠聞是經, 則為無神足; 假使受此法, 分別而無著, 神涌為以達, 一切莫有上。 設於百劫中, 修奉於智慧, 招度世間明, 娛樂所猗行; 如不學此卷, 則不成智慧, 能持此深經。 斯聖達勇猛, 此者則道智, 曉了聖明慧, 若聞深經要, 歡喜受奉持。 有分別深慧, 曉諸法所趣, 當從說是經, 此像之智慧。 修習正經典, 一智無有二, 順持要經籍。」 故修精推行,

爾時,賢者阿難於佛前說頌曰:

「假使四千里, 若猿四千里, 則往聽是經, 順度佛德果, 便往到其家, 不以道為難, 智者當速行, 所在推是經。 其欲速禪思, 越度諸一切, 受持解其義, 誦說此經道, 設求一切安, 志慕菩薩行, 則至安樂國。 講說是經典, 得覩平等覺, 阿彌陀無念, 一切佛所演。」 而修隨經義,

佛言:「善哉,善哉。阿難!審如所言,等無有異。族姓子、族姓 女讚此經者,諷誦之時其心不亂,離一切想;自在其舍,見佛世 尊。讚經不亂,臨壽終時,目覩無數諸佛世尊。所以者何?族姓 子、族姓女一切諸佛皆救護之,受持是經而讀諷誦之所致之也。」

阿惟越致遮經師子女品第十五

爾時,私休童女與五百童女俱問佛言:「唯然世尊!女人若學是經卷者,獲何功德?設諷誦讀,福何所趣?」

佛言:「女人若求無上正真之道,欲學此經,觀餘女人。所以者何?若學此經專精不亂,不効他女貪於塵勞,猶是之緣致女人身。」

私休又問:「何謂女人之塵勞也?為欲所惑奚受女身?」

答曰:「若有女人,見他婦女端正姝好、寶瓔珞身,不以願樂,自觀察已。譬如穢廁,心不樂欲,造污路觀,不以為清。若貪樂是,則受女身。又計女人多懷嫉妬,心口各異,而不相副、不應前後。雖見比丘,但求名聞,不用經法,多懷瞋恚。喜會人客,未甞利求如此像經。若讀誦者,心在著求,其志憒亂,遊于塵埃。以是之故,受女人形,不能除罪。此以女人,設除愛欲,不興邪想,受此經本,持諷誦讀。所以者何?是深尊經,除女塵色。」

又問:「假使女人不願其身,受此經法,持諷誦讀。以何因緣轉女像耶?」

佛言:「欲轉女身,受此經籍,持諷誦讀,不願女人,常畏穢之。 譬如有人見大熾火自投其中,而口說言:『莫令火燒,無使傷 肌。』於童女意云何?彼人言爾,寧得願乎?」

答曰:「不得。天中之天!所以者何?計於火種主有所燒,爛壞肌肉不得無傷。」

佛言:「如是。此經亦然,燒盡塵埃愛欲無餘。設使貪著情欲之態,累世自危。是故女人欲轉是身,速當究竟成於聖道、見無央數諸佛世尊、備無量辯,當受此經持諷誦讀。」

私休童女及五百人俱白佛言:「吾等省念。世尊!往古從定光佛如來、至真、等正覺受此經本,持諷誦讀,為無量億百千之眾演說其義。」

阿難白佛:「此私休身雖為女人,則非女也。所以者何?今吾最後而目察覩,私休童女示現變化乃如是乎。愍傷女人欲以度脫,攝諸男子不見處所,以是感動化眾女人。」

佛言:「阿難!其私休者,非男非女,無有此法。所以者何?觀諸 法本,不得男子、亦無女人,一切諸法皆無可獲,等不差特。所以 者何?如是計之,非男非女。私休童女分別此經,無所罣礙,逮得 法明。是故,阿難!若有女人欲求男子,當順私休修行之法,受是 經卷持諷誦讀。」

爾時,五百比丘尼前白佛言:「吾等之類,從今日始,受是經本,持諷誦讀。不樂女人,穢厭此身。從今以往,不復座寐,諷誦此經,通利乃定。」

時佛讚曰:「善哉!是之所說諷誦斯言,被大德鎧通達精進,不慕女像。是故,仁者!益加勤修,受此經本,持諷誦讀。」

時比丘尼聞佛所說欣然大悅,即脫身衣以覆佛上,而歎頌曰:

「我今日得樂, 望為男子身, 正覺言無異, 必獲世上尊。」

於是,五百長者妻聞比丘尼被是德鎧,即從座起前白佛言:「唯天中天!吾從今始,受此經卷,持諷誦讀。願令我等獲得自在,不繫綴人、莫察他顏,離於魔使難固之患。所以者何?正使女人生于王家,則有所屬不得自在,盡其形壽給事夫婿。是故我等今日始遵精進。假使有人說此經中一句之義,不敢誹謗,至窮命盡不近夫婿,令我等讀解此經。」

於時世尊讚長者妻言:「善哉,善哉!是女人等今於佛前大師子吼,此言甚佳被無極鎧。如人所志不察他顏、不負重擔十月懷軀、亦不加遭而入胞胎。所生佛國清淨佛土,無女人處,莫有寢疵。」阿難問佛:「此諸姊等所生世界,其號云何而無寢疵?」

佛言:「世界號寶蓮華藏,當生彼土。」

又問佛言:「聖號為何如來、至真、等正覺?」

佛言:「佛號一切諸寶妙珍之光如來、至真、等正覺,現在說法。 是長者妻學此經籍,見彼如來。」

時長者妻歡喜踊躍善心生矣,即解頸著百千之寶七寶珠瓔,以散佛 上,同聲說偈言:

「今日獲大望, 當棄女人身, 等覺言無特, 口演至誠語。

當除此愚形, 女人殃罪體,

廢騃志貪著, 不解知本無。

非更於胞胎, 除去所受身,

逮得無上義, 未甞有所處。」

時長者妻說是偈已,瞻仰尊顏,目未甞瞬。

阿惟越致遮經歎法師品第十六

於是,天帝釋則取天華已散佛上,而白佛言:「唯然,世尊!吾以奉受此微妙經。」

答曰:「是故拘翼!蒙此經恩,天阿須倫不興戰鬪。」

於是,文殊師利欲以開化無數百千人民之眾,使立德本,前白佛

言:「如來、至真、等正覺本發道意而諷誦此大法之本。」

佛言:「是故,仁者!於不可計百億那術菩薩最尊光明智聖,普遍十方諸佛之土,猶日宮殿無所不照。」說是語時,此之國土六反震動,遍雨天華。

阿難白佛:「地何故動,而雨天華?」

佛告阿難:「無數億天間文殊師利之所讚詠,心懷踊躍,散此天華 而興立願:『吾等亦當受此經卷,逮得道慧如文殊師利。』適說此 言,眾罪悉畢,得近此經。以故欣然稽首佛足,復禮文殊師利,是 故地動。」

阿難問佛:「是經之德,廣大無極。其聞此經,其得不小,不可妄 遇。」

佛言:「如是,阿難!族姓子、族姓女前後供養無央數佛,爾乃逮聞是經法耳。若聞信樂,受持諷誦,則為天上天下聖神。」

佛語阿難:「假使是經所流布處,則不虛妄,有佛比倫。若有受持諷誦學者,則壞羅網降伏弊魔、則逮法瑛而演法明,勗勉眾冥得至道場。若有從我聞是經籍,歡喜受持而諷誦學,則為佛子從法身生。欲服聖食、坐於佛樹,如吾坐時、講說經法如佛所演,當受是經,持諷誦讀。」

阿難問佛:「惟願世尊說當來者,後豈有人受此經法,持諷誦讀?」

佛言:「阿難!於今現在佛前信者,彼人後世乃信之耳,受持諷誦。佛觀天上、天下、人間、諸魔、梵天、沙門、梵志、諸天人民、及阿須倫,不聞是經。後世聞之而信樂者,未之有也。於今聞者,後乃信耳。譬如長者及長者子,財富無數,獨處藏寶,行到他國。於阿難意,計之云何?其人藏寶不還得耶?」

答言:「得之。所以者何?知其藏處,求輒得之。」

佛言:「如是。今聞是經,後世歸之,猶取藏寶,如佛於此,道眼 覩之。其今現世聞是經法歡喜信者,受持諷誦;後世必獲亦如是。 阿難!汝坐佛前,聽是深經。」

阿惟越致遮經譏謗品第十七

爾時,阿難白佛言:「其聞是經而不信樂、告毀誹謗,罪何所趣?」

佛告阿難:「汝且默然,用是問為?」

阿難白佛:「願佛說之。若不信者,聞誹謗罪,或能自改。」 佛言:「得五逆罪,又復<mark>如</mark>害三千大千世界人命,其罪云何?」

阿難言:「甚多甚多。天中天!以殃無量。」

佛言:「誹謗法者,罪至於此。若復有人破壞、損毀恒邊沙等佛之

塔寺,佛泥洹後火燒寺舍,罪寧多不?」

答曰:「甚多甚多。天中天!是輩之人不當見聞。」

佛言:「阿難!當為其人現說此罪。若復有人毀亂滅盡過去、當

來、現在佛法,其罪如何?」

阿難言:「其罪甚深,不可稱計。」

佛言:「謗是經者,其殃如斯。」

「若止餘人使不學者,罪當奈何。」

佛言:「假使三千大千世界眾生修行十善,又發無上正真道意。若 有一人盡挑其眼,彼罪何如?」

阿難言:「其罪甚多甚多。天中天!無央數劫中常當生盲,又泥犁 火燒之難竟。」

佛語阿難:「我故語汝慇懃囑累。假使有人誹謗、禁止一人不得為此法,罪踰於彼。」

阿難又問:「若復有人發求大道,狐疑是經亦不誹謗,罪何所趣?」

佛言:「其人發意前後狐疑若干之數,常當違遠諸佛世尊;隨其疑數,又從疑數更若干劫乖闊道教。」

阿難白佛:「若不信喜、禁止眾人令不學之,其人受殃身大小、<mark>如</mark> 受罪多少?」

佛言:「且止,阿難!用是問為?」

阿難白佛:「願世尊演說。此四輩中或有爾者,及當來世邊地之土 諸大國人聞是經法多有疑者,當令信解不復誹謗。」

佛言:「其人身當長一萬姟,周遍勤苦毒痛,不可計之。」

阿難問佛言:「其舌大小?」

佛言:「其舌廣長各四萬里,駕犁耕舌五百億載,各五百億歲當吞 銷銅,其火焰赫,及雨身上燒炙無煮。所以者何?此不護舌之所致 也。」

於是四輩諸來眾會衣毛皆竪,淚出而懼,顛倒躄地,同時舉聲求哀悔過:「當為是善男子、善女人請救其罪,乃當毒痛若干之惱,其身長大,苦不可言。」

復有餘人其淚流面前,白佛言:「不能自察今世、後世,心起狐疑。今現佛前及違十方諸佛世尊經籍之教,陰蓋所覆不自見過。今悉自歸佛前,首罪不敢覆藏,惟佛原之。譬如愚騃無知之人,乖其理政,自覩罪咎。惟佛大哀,願見原赦。」

佛告四輩:「善哉,善哉。族姓子、族姓女疑於是法,觀己過罪, 悔彼殃釁,猶日除冥。」 爾時,阿難前白佛言:「今此眾會志懷狐疑,亦當復獲如此罪耶?」

佛言:「阿難!雖懷狐疑,今復悔過,是輩之罪,猶當輕微。」 阿難又問:「願佛說之。」

佛言:「臨壽終時,遭地獄痛。——毛孔,當更無數,不可計患, 猶是餘息。所以者何?在於佛前捨疑悔過,加及十方無數諸佛哀施 恩德。是故,阿難!善男子、善女人當自察之,得身如此,遭無量 痛。聞是經卷歡喜,不當狐疑。其不欲捨佛法聖眾、去來今佛聖法 之教,當信是經,持諷誦讀。」

阿惟越致遮經屬累品第十八

賢者阿難白世尊曰:「諸佛大聖悉等同一說不退輪乎?」

佛言:「如是,等無有異。」

阿難問佛:「假使諸佛同等講不退輪,何因大聖向者說言:『假使 有人不欲違遠佛法聖眾、佛所興顯去來今佛,不當遠離此經之 卷。』?」

阿難又問:「佛說法何所光興?」

佛言:「不退輪眾,為顯佛法,合集聚會。不退轉種,如來所演也。」

阿難又曰:「諸不退轉菩薩大士應聖眾乎?」

佛言:「阿難!清淨正意,發大道心。觀察此意,是輩皆應不退轉眾。」

阿難白佛:「至未甞有。諸佛世尊善權方便,隨時之義顯揚大道。」

爾時,天帝釋即以天華散於佛上而歎頌曰:「令一切人承善權方便 演說經籍。」

佛言:「拘翼!其聞是經歡喜信者,此輩之人猶當以此善權方便說 法開化,多所發起,亦復如我,等無有異。」

爾時,有無數諸天之眾皆以天華供養世尊,俱說斯言:「令一切人逮得此法。」

阿難白佛:「惟願世尊建立大慈,令是經卷後世人蒙之。」

佛告阿難:「善男子、善女人來在此會,後世必值得是經卷。假使 差跌在大海中,應得是經,畢當聞之。所以者何?過去諸佛之所神 變,攝是經法。」

阿難白佛:「雖為過去諸佛威神,亦復現在今者如來、至真、等正 覺之所建立也。」說是語時,三千大千世界六返震動。應時佛前無 央數億百千之華,眾寶蓮華自然湧出,普光眾會各照十方恒沙等 國。爾時,會者遍見十方恒沙等剎佛世尊前有寶蓮華億百千葉,無不達者也。

時天帝釋自變其形,作長者身,擎若干等華分布四輩,而說此言:「願持此華已,散如來、至真、等正覺,又加供養此深經義。」四輩如言,各各取華散諸佛上。眾會皆見所散之華在諸佛上化成華蓋。應時四輩各白佛言:「此何本瑞?光明巍巍乃如是乎?地大震動,又眾寶華化現在佛前,所散諸華,一切佛上變成寶蓋?」佛言:「阿難!皆是經卷之變應也。故當知,建立此經,流布一切,受者則思。」

爾時,阿難復白佛言:「今者,世尊!聖旨之德建此經也。」佛言:「如是建立護,以及現在佛,亦復若此,等無差特。」阿難問佛:「今此經卷,所名云何?如何奉持?」

佛言:「阿難!是經名曰『不猗果實除德迹想』,又名『持信奉法 道迹往來不還無著聲聞緣覺』也,又名『開化弊魔』,又名『遵奉 六度無極』。當持。所以者何?聞此經若信樂者,即當具足六度無 極。」

阿難又問:「云何信樂而奉持者具足六度無極?」

佛語阿難:「若族姓子、族姓女信喜是經不疑,布施則度無極、不 毀失戒則禁無極、在所忍辱則忍無極、亦不應懈怠離于怯弱則進無 極、所為興立如不輕舉則禪無極、一切無念等于諸法則智無極。是 故,阿難!說是經卷號之名曰六度無極,又名『不退轉輪方等之 法』。」

阿難白佛:「唯然,世尊!聞是經名則為大饒益,何況受持諷誦者 乎?」

佛言:「如是,難值。」

阿難又問:「聞是經名能超幾劫?」

佛言:「阿難!聞是經不退轉輪,歡喜信者,則當越除無數千百劫終始之患。」

「假使又聞,棄除貢高,信發道意,是輩云何?」佛言:「阿難!佛皆授決,得為無上正真之道意也。」

爾時,四輩眾會人人其前化有蓮華光色無量,一一華者有無央數百千諸華,各懷悅豫,則取蓮華供養世尊,同音歎曰:「願令吾等值是法世,亦效如今分別說之。」

時佛即笑,便有伎樂而自然鳴,香聞十方;無數千天空中雨華、栴檀粟金、及天心華,諸天之衣散世尊上。

賢者阿難長跪叉手,前白佛言:「佛不妄笑,會當有意。」

佛語阿難:「今諸四輩,天、龍、鬼神、人及非人,聞是經者,後 世所生,輒值此經演說其義,如我今日等無有異。」 佛說是時,賢者阿難、文殊師利菩薩、諸天世人,莫不歡喜。 佛說阿惟越致遮經卷下

CBETA 贊助資訊

(https://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".